

四庫全書

史部



欽定四庫全書

史部

浙江通志卷一百八十六

詳校官給事中臣戴璐

檢討臣德生覆勘

總校官編修臣倉聖脉

校對官中書臣李奎

謄錄進士臣唐燦



欽定四庫全書

浙江通志卷一百八十六

人物

七

孝友

四

衢州府

唐

徐知新

唐書孝友傳知新西安人弘治衢州府志性孝葬父後灑掃墓所者十年產金芝叩之有

聲父老白其事郡邑以聞



徐惠諱

唐書孝友傳惠諱西安人弘治衢州府志五世同居父母亡哀慟過禮靈芝生十連理鄉

里稱其孝感御史大夫宇文融以事聞表其里為孝義

余長安

唐語林衢州人父叔二人為同郡方金所殺長安八歲自誓十七乃復讎大理斷死刺火

元錫奏余氏一家遭橫死者實二平人蒙顯戮者乃一孝子引公羊傳父不受誅子得復讎之義時裴垺為宰相刑部李廊為有司事竟不行

謹按長安府縣志俱作常安考歷代小史與語林同作長故從之

鄭崇義

兩浙名賢錄西安人為郡學士讀書序中忽心痛不可忍曰得無母有故乎奔歸母果病

比卒結廬躬耕墓田以供時薦郡境有蝗獨不食其苗舍南木生連理處置使崔文上其事詔旌門



問後以明經中  
第謝而不仕

宋

慎知禮

宋史本傳衢州信安人父溫其仕錢俶終元帥府判官知禮幼好學年十八獻書於俶署

校書郎命掌書記宋太平興國三年授鴻臚卿歷知陳州興元府母年八十餘居宛丘懇求歸養退處十年縉紳稱其孝友母服除表請納祿至道三年以工部侍郎致仕知禮自幼至白首歲讀五經周而後止每開卷必正衣冠危坐未嘗少懈咸平初卒年七十七

趙雲

名勝志清獻之子岬執父喪甘露降於墓木孝友傳岬子雲又以毀死人稱世孝

江表

萬厯常山縣志字仲長少隨父通議公至京師樞密使曾布以女妻之還鄉閉戶讀書窮日夜



不輟元祐八年補太學生丁父母憂哀毀如不勝  
廬墓側以孝聞宣和間方臘作亂自嚴州趨衢常  
山已燬袁時避地嚴坑躬率鄉兵圍保伍為守境  
計紹興四年謝克家出守衢州首加詢訪隆禮延  
致之以才行奏聞召見除編  
修所刪定官抗疏辭免還山

周子言

正德江山縣志禮賢鄉人有孝行父母  
歿廬墓終喪不以寒暑易心人稱其孝

蔡椿

弘治衢州府志字永年西安人博學強記善屬  
文登進士第父歿廬墓弟松出繼鄭氏椿既仕

得俸即取松歸凡  
先時故廬悉遺之

毛蕃

正德江山縣志棠峰人膂力絕人曉武藝尤  
長於連珠箭父信叔遭賊執欲刃之蕃八直

衝賊陣救父力戰於經堂山賊憚釋其父謂之曰  
所過鄉邑破竹而下若驍悍善射能以牛酒勞我



我即去著八大罵復戰遂遇害屍棄石塘泥坳中  
是夕土石掩埋若神為者兄攀能從徐霖學遭母  
喪廬墓三年縣尹程珣為作  
孝思記蓋兄弟皆有孝行焉

王撰 正德江山縣志父樞密副使被金人執仗義不  
屈而死撰時年十六身犯鋒鏑尋父屍殯於野

晝夜號泣廬墓側者  
六年事聞錄其官

吳槩

西安縣志字致一事繼母以孝聞上舍  
釋褐數歷郡守部使其貧如未達時

陳暄

西安縣志字子舒少喪父事母至孝登第  
後召入史館以不謝用事者出倅隆興府

元

蔣珏

弘治開化縣志字伯玉事父芹澗至孝芹澗歿  
嘗謁墓念親嗜魚傍徨河側忽雙鯉躍出因取



以祭當道異  
之薦舉不受

明

王盛

正德江山縣志事母孝母死廬墓三年鄉人稱之趙一齋為作孝子傳

趙夔

江山縣志字舜臣弱冠補邑庠生宿齋肄業恐違定省涕泣不忍去及司訓高郵迎母就養雖

苜蓿必竭其誠母喪哀毀骨立嘗以靜遠名齊弟子稱為靜遠先生

徐履成

萬厯龍游縣志立德鄉人性篤孝讀書談道門多名士累辟明經以母老不就母卒不

食五日幾絕既葬廬墓三年

徐珙

明實錄龍游縣學生以善剪字篆書授陝西都司經歷父喪蔬食廬墓三年服闋改任常州府



通判迎母錢氏就養錢歿合葬父墓復蔬食廬墓三年以父存日最愛蓮植蓮數本於墓下未幾花

開並蒂詔旌

其門曰孝行

方冕

萬歷龍游縣志字尚周性孤介事繼母撫昆弟遺孤人稱孝友以貢除兵馬副指揮年餘念母

老上書乞終養居官一無所取嘗却徐總戎金而寘之法時服其廉及母死朝夕哀號目為失明子

鏗  
鄱州寧都簿

楊鏞

衢州府志西安人添之曾孫兒時即習定省儀長不染貨利正德中貢入太學忽心悸過歸父

吳果疾越十日卒後以母老遂不赴選母病三年非迎醫未嘗去左右母卒鏞以哀毀歿孫梁登進

士



何倫

趙鏗孝子何倫傳字宗道江山人天性至孝居父憂哀毀踰禮忌日涕泣如初喪事母毛氏尤

謹溫清定省事事必如禮家雖貧甘旨不缺衣服必備一日母失難陽為尋覓陰求其似者以進或笑其迂則曰不若是無以慰母心及母亡喪葬盡禮三年疏食如一日喪畢猶不釋服不入內鄉飲亦不赴曰親在淺土吾其忍乎家貧失學年二十七始發憤讀書初從陽明先生學既從王心齋王龍溪諸公遊晚復拜甘泉先生於南都及歸充然如有得一夜盜入其室竊器物而出倫覺其入而不呼將取釜始言曰盍留此以備吾母晨炊盜赧然盡還其器發聲曰盜孝子物不祥自是其人亦不復為盜

程本

金實程孝子傳開化馮金村人幼好學涉聞經史大義永樂丙申母疾殆甚百計不療乃齋沐



夜禱於玉霄宮置刀案上頓顙出血引刀刺脇者  
三刀墜地血滂然流仆絕良久乃蘇而受刀處痛  
稍止刀上見紫血一縷長尺餘大如韭葉視之肝  
也持歸煮糜以進母絕粒彌旬至是聞粥香吸之  
畧盡乃不藥而瘳後六年母復遘疾數刲股以進  
不數日諸疾盡脫康強十餘載年八十而終宣德  
間有司辟為江浙帥閫掾三司之長莫弗賢之兄  
性存為河南某縣丞以疾卒本悲痛號絕旬旬扶  
櫬歸葬撫其遺孤愈於已子弘治衢州府  
志字邦寧性至孝大學士商輅為作墓銘

### 張永昌

弘治衢州府志開化人弘治九年家大疫母  
垂死無可致力乃齧天潛以刀剗股肉熟而

奉之母云何從得此吾心頓爽矣永昌血甚昏仆  
人莫之知適有靈祠巫降者曰前村張某為母割  
股流血且死宜亟往救衆往果然傳以  
藥久之乃甦母卒愈人皆稱為張孝子



徐曦

天啟衡州府志字叔脩開化人由舉人學正官文淵閣纂修父年高乞歸養與弟叔謙甘旨盡

歡墳麓為樂喪葬盡禮人皆以孝友稱之

汪悅

萬歷常山縣志字德進甫三歲父行賈虧匱流離二十餘年莫知向往悅育於母稍長時向

母問父狀貌知左脇有黑痣欲求之不能自給比業醫頗得資訪知父在山東乃裹糧躡屨四年始得之濟南郡中解脇驗之良是父子相持而哭父於旅邸已別娶生女贅夫遂以家事付其女夫而歸奉養二十餘年以壽終悅年八十餘卒

璩伯綵

江山縣志字子光家貧力耕以事母母病躬視湯藥妻拂母意即出之母吐痰盈甌伯綵

私取吞之曰痰寧病我因引刀割乳封股弟伯縉亦封股煮粥糜以進疾果痊後十年母卒哀毀廬



於墓側有芝草生其傍  
直指以狀聞詔旌其閭

王仲義

江山縣志字宜之父篤疾賴以身代及卒廬墓三年刻木為像事之如生母薛病卒廬墓

哀毀過甚竟死墓所妻  
徐亦以孝聞有司旌之

徐員

萬歷常山縣志字必方少孤貧依母再醮其弟曰進曰安曰掌俱四散糊口員稍長蚤起獲金

環一枚於道用居積輒大售以起乃迎母歸養以次贖諸弟進先至後召安末欲召掌二弟有難色員曰義不可以利制弟而可棄吾不得與子先共鋪糜矣二弟悟掌亦歸家成均析鄉黨服其義員

年八十餘  
廣信府教授

張懷貞

弘治衢州府志字應祥開化人父邦達任知縣有罪當刑伏闕陳情乞以身代上憐其意



俱釋之尋陞邦達監察御史

王鐸

衢州府志字孔振西安人正德庚午舉人為崇仁知縣疏立吳與弼專祠調湖廣竹溪縣決屢

年滯獄三告養親不允及父卒遂終身不仕以事母

毛公器

正德江山縣志父歿廬墓三年母歿仍廬墓側朝夕哀號有烏鳥馴遠人以為孝感有司

以事聞旌其門

邵信賢

弘治衢州府志字啟明常山人幼失父事母徐尤加謹母病躬侍湯藥衣不解帶母年九

十四信賢時亦七十母歿葺草為窩僅可容身置喪側枕塊而卧朝夕哀慟因疾以終與母同日葬

馬後以子思祥貴贈員外郎



龔崇堯

萬厯龍游縣志父有疾經歲不瘳崇堯日夜

甚崇堯號泣柩側俄返風火滅葬時有異鳥數百集塚上監司屢旌其門

蔡惠

兩浙名賢錄字子仁西安人師事王文成潛心理學事父母曲盡孝道母嘗患瘋疾手足拘攣

者十三年惠溫衾扇枕飲食撫摩必躬必親始終不怠及父母相繼卒與妻吳氏負土成墳廬墓三載朝夕哭奠哀經不去身一夜風雨虎入其廬馴若畜犬服闋南宵移為六堂學長辭不赴時龍游水北梗化郡邑請惠往布行鄉約梗化者革心自是深居寡出而四方學者數百人以壽卒於家

陳恩

衢州府志字廷受西安人正德戊辰進士為中書舍人充趙王陵寢使邵王餽先是公車北上

聞父疾遂歸其在南雍時夢母疾徒步至家兩足重繭母疾竟瘳咸謂孝行所感



葉希學

萬厯龍游縣志幼孤育於母傳既長孝謹備至兄客死撫其三子如已出母卒哀毀垂絕

子茂堅亦以孝稱茂堅子昌竭力奉父父病顛天以身代及不起廬墓終喪靈鵲來巢人稱孝感年

百歲而卒萬厯十六年  
詔建坊曰孝子百歲坊

施介夫

開化縣志字公毅尚書郎恕之子母虞有疾侍奉湯藥衣不解帶者逾月母逝嘔血毀瘠

扶柩還至丹陽時久旱河水絕流呼天號泣是夕大雨河水溢遂得歸葬母性嗜李介夫見之必泣家人不敢復設從陳白  
沙莊定山張東白遊

余居中

西安縣志性純孝二親逝幾不欲生每當春秋舉奠時必伏地悲號杖而後能起旁觀者

為之酸鼻以母  
諱日嘔血而卒



劉士傑

西安縣志少孤事母至孝母病額天割股母歿廬墓三年縣榜其門曰敦孝

徐日敷

徐鳴玉徐孝子傳西安人甫九歲父病篤額天願以身代及歿哀動路人稍長事母克盡

色養侍寢問膳愛敬備至五十年如一日母七旬齒落令婦以乳哺之兄亡撫姪姪亡嫁姪孫女不

異所生學行兼茂為鄉里所式

陳情

衢州府志字汝孝西安人親疾額天求代既葬有馴燕舞於墓側甘露降於墓木者五日為府

學生與同邑王之屏講明理學旁及天文地理諸子百家之書數奇不售晚舉孝行郡守易倣之為

傳作

汪令德

開化縣志字潤中孝廉朝仕長子總角失怙事寡母張承顏迎志曲盡心力撫弟妹各底



於成與弟令儀舌耕供  
母晚舉明經司訓瑞安

徐應雷

衢州府志字震伯西安人五歲喪母哀毀如成人事繼母吳氏以孝稱吳多病應雷侍天

願以身代叔某故庶出也父任道友愛之甚篤父卒應雷事之無異於父一時皆稱其孝友

國朝

葉南生

舊浙江通志字珂玉號蒼眉天性孝友幼失恃哀毀骨立如成人及長父病革告天刲股

絕而復甦者踰月及卒家雖貧貧祭葬如禮事繼母盡孝撫幼弟極友愛扶之成立已卯舉於鄉司李

荆南尋解綬

歸卒年七十

江上達

衢州府志字仲顯開化人性至孝父愛延客上達奉耕侍立至午夜父不寢不敢寢遵父



命焚遺券濟急拯危無虛日明季寇盜充斥過其門皆曰此長者居勿入也二子長南齡次南極以

南齡歲進士封奉政大夫年八十六卒

徐錫德

衢州府志字克明常山人大雅孫少孤貧母

侍奉惟謹湯藥必親嘗衣不解帶者累月撫弟姪皆篤恩義取產均析則讓膏腴而受磽瘠其他樂善好施或焚券或輸金不可枚舉題旌冊雍正六年具題奉旌

宋觀教

公舉事實開化人性孝父行孺卒哀毀不欲生遇祭辰必號泣終日母金患瘋疾親侍湯

藥不離卧榻者十五年後復染他症觀教焚香頌天願以身代疾漸愈又三年乃歿哀痛如喪父時廬墓數載甲寅歲姪弘禮弘信為寇所擄觀教罄囊贖歸市



聞奉旌

樊之鏞

公舉事實常山學原生父堯康卒躡踊成服水漿不入口者七日事母詹氏尤孝謹毋疾

躬視湯藥衣不解帶顙天順以身代及死哀毀如喪父時既葬結茅墓側者二十一年後以哀毀成

聞奉旌

疾竟不起事

董斌

公舉事實龍游人甲寅閏變奉二親避居村落力田以供父母父病篤顙天請代雙目流血父

母相繼終廬墓三載  
雍正六年具題奉旌

趙叔廣

公舉事實常山人父為賊所擄叔廣牽衣號慟不忍舍賊怒拔劍欲殺叔廣冒刃請以

身代賊憐而釋之遂得俱免於難母老兩目失明叔廣以舌砥之嚙指血和藥以療期年復明雍正



六年具  
題奉旌

詹鳳儀

題旌冊字韶成常山人九歲喪父呼天搶地  
幾不欲生每出就外傳必稟命先歸代母執

變母歿悲慟終其身  
雍正六年具題奉旌

汪允祐

題旌冊開化人負母避賊不憚險阻棄妻不  
顧妻投水而死允祐逃至遂邑山中糧盡乞

食以奉母後母卒廬墓三  
年雍正六年具題奉旌

張延聖

題旌冊開化人性至孝家貧菽水承歡康熙  
甲寅值閏逆之亂山寇竊發父為賊所獲延

聖星夜匍匐直闖賊營求以身代賊并繫之並受  
拷掠日久管束少懈乘夜負父越牆而逃追急匿  
橋下深水中遂得脫兄延毓早喪遺孤森年十歲  
亦被擄不知所往父痛念其孫延聖不避艱阻尋



至江西樂平縣聞在賊寨百計措金贖回母病衣不解帶及歿哀毀骨立廬墓三年雍正六年具題奉  
旌

徐灝

公舉事實字景梁常山人性至孝康熙甲寅耿逆陷城父錫德被擄酷刑索餉時灝甫十四以

身蔽翼叩顙流血曰寧筮我勿傷吾父賊感其誠兩釋之後父患喘疾灝侍湯藥衣不解帶者五載及歿殯葬盡禮廬墓三年猶不反親舊以禮相繩灝泣曰吾久侍左右何忍置親獨處荒邱也族人

有爭產者經年不能解灝開誠諭之曰若輩第知有產亦念先人原屬一體乎遂剖已地以釋其爭

嚴州府

晉



夏孝先

水經注孝先少喪二親負土成墓數年不勝卒元豐九域志嚴州州民喪父廬於墓側嘗

有野火奄至俄而火為之滅尋復湧泉出其地

唐

祝希進

唐書孝友傳希進桐廬人嚴陵志父喪廬墓側芝草生有巨蛇至其所元和四年旌表

許利川

唐書孝友傳利川睦州人冊府元龜為睦州司士參軍居母喪以孝聞有芝草八莖及連

理樹一株產於墓廬詔旌表其門

陳京

明一統志桐廬人有至行親喪廬墓大厯十年刺史蕭定上言表其門時人目所居鄉曰至德

里曰如曾



戴元益

唐書孝友傳元益桐廬人嚴陵志五世同居庭木紫薇枝生連理咸通八年刺史張蒸以

聞旌其門閭

何起門

唐書孝友傳起門建德人續文獻通考父死廬墓大厯中刺史蕭定以狀聞旌其門

宋

周大雅

嚴陵志壽昌人業進士治平中居親喪廬墓三年羶帶不入口有羣鳥馴其旁趙清獻朴

還自京師道縣聞之因訪焉察其實行請於朝改鄉曰至孝里曰求忠今父溪南即其廬

陳氏三子

嚴陵志分水人莫詳其名因父抱患危重三子同日封股肉煮粥進父即愈景定庚

中立縣蔣曉立坊旌之



徐亨

嘉靖浙江通志桐廬人宣和初方臘寇起亨兄為賊所執亨叩頭告曰家有老母兄能養請代

其死賊舍其兄而假亨

陸時雍

嘉靖浙江通志淳安人幼孤貧與兄力樵以養母稍長補郡學生念母兄食不給語掌膳

者曰吾日飯勿盡炊願輟一膳遺母自以一膳分為晨午後登宣和三年進士第中博學宏詞科歷秘書丞知建昌軍請以憲官其兄子

徐明

嚴陵志建德人紹興九年母病封脅取肝以療之母病即愈

余機

嚴陵志字大倫遂安人母喪明以舌舐之復明如故嘉定元年舉孝廉授江陰令

方彛

萬厯嚴州府志淳安人事父母至孝嘉靖戊寅知州鄭之悌名其里曰孝養



唐時澤

萬厯嚴州府志淳安人兄弟友愛終身無間言嘉定戊寅知州鄭之悌名其里曰友恭

何崇源

新定續志居建德縣買犢鄉母蔣氏年八十景定四年抱患沉重崇源於右股封肉煮

粥奉母即愈咸淳五年母再疾復行封股母病隨愈本縣躬親存問申府永免戶役

陳師清

新定續志居建德縣仁行鄉母年八十咸淳五年六月抱患危篤師清就右脅取肝煮粥

奉母即安  
事聞旌表

蔣德定

新定續志居建德縣買犢鄉母吳氏抱患沉重德定就右股封肉煮粥奉母即愈有司以

聞詔旌  
其門

徐大發

新定續志居建德縣慈順鄉母劉咸淳六年七月抱患危重大發同姊五娘各就左股封



肉煮粥奉母即愈  
事聞詔表門閭

元

余丙

元史本傳遂安人幼喪母泣血成疾父亡不忍葬結廬古山下殯其中日閉戶守視有牧童遺

火延殯廬丙與子慈亟撲不止欲  
投火中與樞俱焚俄暴雨火滅

姜兼

元史本傳淳安人七歲而孤養母至孝母死哀慕幾絕既葬獨居墓下朝夕哭奠寂焉荒山中

躬自樵爨蔬食飲水一衣麻寒暑不易同里陳氏  
戴氏子不能事其父母間兼之行慙感而悔皆迎

養  
焉

汪以興

嚴陵志字伯可淳安人母聶氏生以興一歲  
被逐鞠於嫡母既長知其故乃裹糧四方尋



訪日久糧絕草眠丐食至宣城  
方得遇遂奉歸養十年乃終

邵景新

嚴陵志淳安人幼失父事母黃氏甚謹每遇  
病衣不解帶湯藥必親煮嘗而後進母年九

十餘常穢床褥問景新輒以手除之及母歿停  
喪三年卧棺側寢苦枕塊朝夕哭奠如初喪

明

姚甫

姚夔姚甫擔骸傳字伯華桐廬人元末兵亂甫  
家頗溫厚奉二親匿閭原山中各挾資費以行

倉卒為羣盜所迫投叢莽間散失不知所  
父出呼子為後盜所得母聞賫所挾物馳救盜並  
推崖下墜石死明日盜稍退甫遍野號呼追求不  
得哭聲徹天有告者曰爾親在崖下趨視之則皆  
死矣甫用絳紬被二裹其父母以肩擔之乘夜由  
間道奔桐江至姚家山祖墳之右採樹葉掩之查



伏夜作二晝夜穴成負二骸殯於穴仍負土築塋  
高三尺痛哭嘔血而出計遇難時二月也不知死  
日每臨二月則終月絕酒食擁爐而泣淚傾注灰  
盡濕不已奉祭祀執爵哀呼如在膝下路人聞之  
無不感動子唯大仕洛陽令孫夔吏部左侍郎龍  
河南左參政甫壽七十卒贈通議大夫禮部右侍  
郎葬祖墳之次人  
號為廷慶墓云

蔡廷璫

嚴陵志建德人性孝友父子儀病篤廷璫焚  
香籲天乞以身代遂愈母盲廷璫捐資濟貧

祈保母目復明成化四年  
知府張永以聞旌表其門

潘仲春

分水縣志字正和嘉靖癸巳父訪卒喪葬盡  
禮同兄孟春弟應春廬於墓左邑令旌其門

朔望必親詣馬已酉以明經選撫州府教授署臨  
川金谿二縣事循良大著仕豫章十年歸著有文



集行  
於世

汪士臣

淳安縣志邑諸生父病劇晝夜不解帶因積痺病目失明比父病痊已目亦復明人以

為孝感後父故叔婦繼逝遺孤三尺親愛甚篤延師擇配分已產以贍之鄉族稱其義

邵焜

嚴州府志淳安郡學生孩提時即知謹事二親父遭重疾百方禱治不效乃割股以進尋愈萬

歷二十年學使題額曰旌孝以表之

方汝成

淳安縣志邑東金坂人事父母溫清必敬父歿廬墓三年母歿亦如之縣令海瑞親謁其

廬題贈旌孝二字

徐璠

建德縣志居父喪盡禮母病家被火乃衝火負母以出母生而璠則患瘵以死妻宋氏安貧守



志

方雲槐

遂安縣志字慕庭六歲父文謹卒事母余氏至孝家貧力耕卜葬祖父負土成墳孺慕七

十年如一日晚賓於鄉壽終隆慶二年知縣周恪表其閭曰節孝之門

王瑁

兩浙名賢錄桐廬人幼失父事母至孝居喪哀毀骨立負土營葬廬墓三年慈鴉數百集於塚

木瑁朝夕哭鴉亦哀鳴與相應喪畢瑁歸鴉亦散去人以為孝感

章琳

桐廬縣志字元器鍾山鄉人節婦駱氏子也六歲母病時值溽暑即能為母扇枕人號為小黃

香母寢室後有巨木多蛇母見驚病琳焚香籲天是夜風雷大作拔木出牆外母病即愈母歿廬墓三年寒暑無間作哀思錄數十章府縣申請旌表給以冠帶年八十卒



方貫

萬厯嚴州府志淳安人家貧采薪以養父母父母歿負土為墳廬側三年虎至貫所亦不為暴

終喪繪二親像凡事必告飲食必薦如親在時終身不娶迭奉院道旌異

戴啟祥

建德縣志字警絃震亨子為國學生父卒哀號幾斃以母在勉強飲食母年八十六卒撫

棺慟曰兒一終母事即相隨地下矣抱病伏上以哀毀嘔血而亡子東旻成萬厯己未進士疏其事於朝命有司建坊旌表祀鄉賢

毛國章

遂安縣志字思程邑庠生吏部一瓚次子事父服勤盡孝及居憂廬墓三年足跡不至私

室朝夕哭臨如初喪承遺命為伯父一珍服三年喪貲產一無所取

姜宗齊

嚴州府志建德人父病篤割股救療以生後父故家貧如洗奉寡母撫幼弟不辭勞瘁母



病焚香祝天顏以身代湯藥親嘗跪送  
得母歡心母終以香木刻二親事之

毛存元

獻徵錄字時春事母至孝母愉亦愉母泣亦泣母不食亦不食母恚怒則長跼竟日必怒

釋而後起後母病將革存元目不交睫衣不解帶  
者決旬祝於天顏以身代迨逝絕漿屏粒雞骨支  
牀為孺子泣邑令感其  
孝以詩弔之并及母節

陳滄

王恩任孝紋堂記字友泉淳邑諸生事嚴父惟  
謹母疾終月不解帶母卒廬墓三載事庶母若

嫡友異母弟胞晚年紋在其手曰全孝其  
孫王政徵堂額於予為題孝紋堂以歸之

國朝

徐萬照

舊浙江通志分水庠生父志進崇禎間任襄  
陽通判旋致仕丙戌山賊執志進索餽貧無



以應萬照奔前救父願以身代賊不聽殺  
志進萬照奮不顧身以頭觸之亦遇害

詹符

舊浙江通志遂安人在前子康熙甲寅山寇亂  
符負父疾走數里賊追及以身蔽父賊怒殺之

父卒  
以免

毛周尹

遂安縣志字藩侯十一都義門人性至孝母  
卒哀毀骨立順治乙未山寇掠其父之恒索

重貲取贖周尹鬻產稱貸三赴賊營贖父不得力  
已竭乃號泣請以身贖代父歸數日其父往贖則  
賊已解散周尹不可踪跡蓋死於賊中云康熙五  
十二年旌表其門妻王氏守節撫孤並同旌表時  
同族毛如絲父亦陷賊力不能贖乃以身代  
父復自用計脫歸卒父子俱全衆尤異之

方之琪

公舉事實遂安人侍父病衣不解帶湯藥必  
親嘗及卒廬墓三年如一日甲寅弟為寇所



擄母朝夕思念不已琪跋涉七年備歷勞苦始得  
弟歸事

聞奉旌

童愷

公舉事實遂安人父升卒勺水不入口者三日  
孺慕終身母病涕泣悲號至嘗矢以驗及母卒

哀毀廬墓郡守聞之  
扁其門曰純孝足風

余琪

公舉事實遂安人父人龍病顛天請以身代病  
獲痊母患瘋摩躬視湯藥衣不解帶者數載居  
喪哀毀聞者垂涕後葬松靈山三年寢食墓側奉  
侍如生後琪年至八十子孫介壽稱觴猶相顧泣

曰爾逮事父母予不逮事  
父母耄年隱痛其有極乎

任鼎福

題旌冊遂安人母病醫藥弗痊鼎福顛天虔  
禱五晝夜而母疾愈後年六十乃終與父合



葬廬墓三載始歸康熙

五十九年具題奉旌

汪達

題旌冊淳安人母卒哭泣擗踊水漿不入口每念劬勞之恩輒嗚咽不自勝竟以憂思成疾越

三載亦卒雍正四年具題奉旌

吳達觀

題旌冊淳安人母喪號慟兩目俱昏父喪哀毀骨立廬墓數載雍正四年奉旌

吳家駿

題旌冊淳安人母病癰家駿以口吮之夜則焚香露禱願減己年以益母壽母終執喪哀

毀既葬守墓三載雍正四年具題奉旌

余樹勛

題旌冊遂安人父卒廬墓三載事寡母尤孝謹凡服食起居必親為調理母歿哀毀盡理

如喪父時雍正五年具題奉旌



阮駿

題旌冊淳安人八歲失母號泣柩前不飲食者累日年十八父病篤願天求代及歿哀毀骨立

葬後廬墓三年雍正六年具題奉旌

## 溫州府

宋

仰忻

宋史本傳字天貺溫州永嘉人年五十餘執母喪盡孝禮躬自負土廬於墓側有慈烏白竹之

瑞紹聖中郡守楊靖表其里為孝廉坊大觀二年以行取士郡以忻應詔未幾卒贈將仕郎

王輔

甌江逸志父格病篤思得鯽魚方盛暑不易致輔禱於井釣而得巨鱗進父病旋愈輔子年十

一親見之王十朋孝感并詩注予家有井稍大俗稱大井王家宣和壬寅秋先祖有疾思鯽魚時暑



不可致先人釣於井而得之井素無魚蓋孝感也

趙彥霄

自警編政和間溫人趙彥霄兄弟二人父母服闋後同喪十二年兄彥雲聲色自娛遂求

析籍五年生計蕩然逋負出三千餘紙霄因除夕置酒邀兄嫂告曰向者初無分費意以兄用度不節恐昏蕩盡俱有饑寒之憂今幸留一半亦足以給兄自今復歸中堂以主家務即取分書焚之管鑰之屬悉以付焉且言所逋負已儲錢償之矣兄有慚色從之次年彥霄與長子俱膺鄉薦一舉登第

陳宗

宋史本傳永嘉人年十六母蔡病篤割股為餌病愈已而復病不救宗一慟而絕郡守陸德與

云陳宗自毀其體哀慟傷生雖非孝道之正而能為人所難為之事亦天性之至官為合葬榜曰陳



孝子墓

薛特立

萬曆温州府志字才翁永嘉人事母孝母年八十四齒盡脫特立夜焚香以禱於天歲餘

母齒更生後以特科授承奉郎

張氏子

萬曆温州府志逸其名性至孝親歿廬墓

錢文卿

嘉靖浙江通志樂清人方數歲執父喪如成人時三舍法行文卿方冠領郡學生諸生肅

然欽之奉母居白石山閭族同居三十餘年無間言

連世瑜

萬曆温州府志樂清人同妻方氏事母孝母死刻像以奉王十朋詣其家詢得實迹白之

郡其酒禮之



周忠輔

萬歷溫州府志字端臣永嘉人母葉氏嘗病癱竭力醫治藥必親嘗衣不解帶及母亡哀

毀成疾卒

元

周樂

元史本傳溫州瑞安人宋狀元坦之後父日成通經能文海賊竊據溫州拘日成置海舟上樂

隨往市其父甚謹一日賊酋遣人沉日成於水樂泣請曰我有祖母幸留父侍養請以已代父死不聽樂抱父不捨遂同死焉

王貴翁

瑞安縣志字君傳家貧授徒養母至正丙申山寇至貴翁不顧妻子負母避北海山為賊

所執求贖弗獲褫其母衣貴翁抱母血泣賊怒殺之越三日母亦卒



朱童子

永嘉縣志逸其名居江濱海寇猝至母投江童子哭母亦投江死

李寔

萬厯温州府志樂清人元兵南下寔奉祖母

母肩母號泣取水以沃火主者怒將斬之寔懸金刀頭挺身求贖見無活母意置金地上曰若去父母妻子萬里至吾土獨不愛其身乎若殺吾母吾寧甘心若耶主者顧左右曰真男子不畏死令取金而俱釋之後以子孝先貴贈員外郎

胡野廬

永嘉縣志父義為縣胥徙縣尹劉公源弟公寬以兵襲方明善弗克方盡捕劉氏黨義被

執野廬挺然出曰事劉尹者我也執父奚為遂斬野廬而釋其父

周士威

萬厯温州府志永嘉人至元戊戌方明善據溫居千佛寺士威兄士行為明善守柵門因



劉公寬夜襲罷守門明善囚士行於獄士咸詣獄吏請曰吾兄弟皆孤藉外祖母夏氏以存今夏氏八十六矣幸兄在求食養之吾無能為願以身代獄吏憐而易之士咸遂遇害

魏保

萬歷溫州府志永嘉人父忠亦以守門為明善所執將斬之保趨刑所以身蔽其父曰是夕守

門者保也保當罪仲頸受刃父得釋

林甲乙

萬歷溫州府志樂清人早喪父傭作養母及母卒家貧斂以薄棺越數日屍壞液流棺外

穢氣遠聞甲乙盛以磁器對天慟哭盡飲之流液遂止穢氣亦息人以為孝感所致

張端

平陽縣志涿州人父君錫至正末任平陽州判官因家馬時方明善破平陽俘君錫入郡城端

隨往日夜涕泣不食父曰我分在必死爾歸視家勿以我為念端曰父辱子死兒寧獨生既而明善



沉君錫於江端  
抱父俱沉死

王泰

最樂編永嘉人幼失怙恃鞠於伯父吳元年冬明兵至伯父為兵所執求財物不得將殺之泰

年十五匿叢薄中躍出給兵曰兒知瘞物處伯父遂得釋去泰引兵佯掘數坎悉無物乃涕泣告曰兒實欲脫伯父而代之死兵怒斬之仆於地各散去伯父還撫泰屍哭見頸骨已斷而喉尚連屬乃捧其首合於頸取藥塗瘡舁之床試以水滴口稍能嚙七日乃甦言方斬時若風冷然過頸良久熱痛暈去若有數人過且指曰此子甚孝不當死即令一人療治之頸若冰雪痛遂止凡八越月瘡始合而首竟偏

明



薛敬

萬厯温州府志字思恭永嘉人幼孤同兄養母一日母過姻戚家至暮敬往迎歸池側母墮

池中敬投水兄抱母兄適至援母得生敬竟歿

張正

蘇伯衡張正傳字思中平陽登瀛里人九歲父仲達喪鞠於母林十三歲母瘡發於額醫視曰

此瘡惡不可言腫若至鼻即不可治正憂懼倉皇走城隍祠匍匐泣禱引刀割股肉持還家粥以食母瘡立愈年三十娶婦陳事姑稍懈正曰娶所以為養也若不盡力奉母何以爾為妻亦感悟洪武丁巳秋母滯下伏枕血糞淋漓正時以手掬去之無難色後六年母疾醫謝不可為正禱於東嶽行祠復封股和藥藥未進而母歿矣朝夕悲號既葬日至墓所哭泣無間寒暑

陳經孚

名山歲平陽人少孤事母至孝遇倭至負母逃避竟遇之途倭索母耳環經孚護之倭以



刀戕母耳及其肩而死  
手猶未釋母也

黃遜

永嘉縣志痛父早逝奉母極孝母眩目失明遜扶持不少離母歿哀毀踰禮與人言及父母輒

涕泣廬墓終身

章友善

平陽縣志父成高在海塘虎攫之友善奮不顧身疾奔以拳毆虎筋骨盡露虎棄去父得

活後友善手愈而骨折

薛必光

溫州府志平陽人少孤年十三事母及祖母盡瘁傭作以養祖母及卒嚮身以侍喪事母

病剗股以療及卒柩在家倭寇大至空村避去必光獨守母柩不避賊亦不入人謂孝感

南孟明

溫州府志永嘉人父文相以荒穀事罹罪孟明方弱冠挺身代父備受筴楚事白郡守劉



芳譽褒  
其孝

王欽穆

温州府志永嘉人父以中書謫戍閩省欽穆年十三詣闕上書朝憫其孝為復父職

朱元昊

名山藏樂清人事母孝母性嚴厲元昊年五十嘗受笞治生池上值寒凍誤墜水中母疑

其受笞而愠也怒復杖之衆為跪請得已其妻又以子婦之讒不悅於姑元昊不敢辨屏之十餘年寢處常在母側後以庠生應貢且行母乃召其妻復為姑婦如初

陳序

平陽縣志字惟倫正統間父侃病劇三封股以療大學士李東陽作詩紀其事

葉世愛

萬厯温州府志字友敬樂清人家貧出遇甘美必懷以遺親親病時多蚊乃裸卧其旁以

身飼蚊親不食亦不食早喪妻或勸之娶曰男于失義何以責婦人乎



陳厚

樂清縣志 業傭作漁於海得鮮必供母母病盡衣被單寒以身溫母母死殯山谷間夜雨常以

蓑笠往卧柩側一日外出夜半暴雷即奔赴柩所

何小二

萬歷溫州府志 樂清人年十歲父為寇所執貧不能贖小二請往代母固止之泣曰父歸

則舉家可活否則俱死遂竊往得父還小二竟不知所終

姜約

姜綱

瑞安縣志 約字子充弟綱字子斐俱廩生事親孝養備至兄弟燕見如賓斗粟

尺帛未嘗私入親歿廬墓三年約以貢死京邱綱聞朝夕慟哭迎櫬歸數日亦飲哀而卒

葉瀚

永嘉縣志 幼孤事母病數歲不懈妻不順母意逐出之邑令邱汝材表其門

國朝



呂世英

舊浙江通志永嘉人父鳴益疾篤世英割股療之至再病再割皆愈順治六年巡按趙端

具題

奉旌

處州府

宋

何執中

宋史本傳字俗道龍泉人進士高第為大學博士以母憂去寓蘇州比隣夜半火執中拊

柩號慟誓與俱焚有頃火卻柩得存大觀初進中書門下侍郎為太宰遷少師封榮國公卒贈太師

追封清源郡

王諡正獻

高停肱

括蒼彙紀麗水人七歲喪父廬墓盡孝至和中郡上其事表其門後名其子曰孝臣



陳茂元

括蒼景紀麗水人居母喪哀慟水漿不入口者四日既葬廬墓太守崔愈躬顧其廬改所

居為孝行鄉表其行實於  
朝治平元年勅賜粟帛

趙文澤

續文獻通考麗水人六歲喪父廬墓有羣鼠啣花白鶴來巢之異郡表於朝大觀初詔賜

帛五十疋

周竒

括蒼景紀麗水人九歲喪母卧墳側二年有赤雀數十巢其旁可俯而窺崇寧中詔賜粟帛

周智

括蒼景紀字惠卿麗水人六歲喪父廬墓有紫芝一莖七葉之瑞郡上其行於朝會成均策試

多士以商山節婦麗水孝童為問徽宗覽之命編入時政記高宗朝勅賜孝童出身終從政郎嚴州

建德  
丞



潘洵仁

括蒼彙紀字行中松陽人宣和中盜起奉親逃匿遇賊奮身翼父身被重創不少却賊內

刃相顧曰孝子也引去及長遊場屋不利遂躬耕以悅親孫重開登淳熙十一年進士

周孝聞

括蒼彙紀龍泉人七歲居母喪廬墓政和十年以孝行薦命以官不受邑人即其所居立

門曰孝子以旌之

楊富老

續文獻通考麗水人七歲喪父廬墓三年不返烏鵲來巢木生連理紹興中太守葉頤奏

於朝詔賜粟帛錄付國史

王源

蒼彙紀麗水人父大方紹興中任江西安撫司既卒歸葬於鄉之梅村源方九歲廬墓哀毀

癯瘠服闋父老列狀於郡太守謝伋延入郡學奏於朝賜粟帛宣付史館



詹迴

括蒼彙紀字明遠縉雲人幼廬墓致甘露降於家官至禮部尚書觀文殿大學士少保齊國公

致仕

葉應光

括蒼彙紀麗水人咸淳中母王氏病革應光夜半燃香禱天俄有鳩飛墜應光取烹和粥

以進母病即愈元至元間者老舉其孝行表其門

薛溶

括蒼彙紀字平川松楊人繼母項氏性酷溶曲為承順奉養備至每歲時為壽率子弟羅拜積

久項感悟愛溶若已出及項歿喪祭盡禮宋太史濂嘗稱之

元

祝公榮

元史本傳字大昌處州麗水人隱居養親事母甚孝母歿居喪盡禮竈突失火公榮力不



能救乃伏棺悲哭火自滅鄉里異之塑二親像於堂朝夕事之如生

潘抃

景寧縣志字熙道惟德子父喪哀毀蔬食三年不入內寢事後母尤孝謹元祐中以孝行徵

葉峴

括蒼景紀字見山青田人母嘗病心痛扶持不離側母憐之令外息峴夜潛入間壁捫心達旦

母終舉進士  
歷官南安尹

詹國芳

括蒼景紀松陽人元季兵亂親不獲葬寇至國芳抱棺號泣寇曰孝子也不忍加害既葬

廬墓哀感積雨崩廬體不受傷衆異之

劉順

括蒼景紀字子謙松陽人父故母病竭力罄家貲以延醫至廢寢食母將危刲股進療焚香告

天願以身代迨母病瘳絕輦酒以祝母壽邑尹表其門



明

祝崑

明孝友傳麗水人元末奉母避賊山中賊追及母急投崖下崑擲身赴救忽雷雨大作賊駭散

一時避難者俱脫母墜深崖幾絕崑挂樹梢不死卒負母而登洪武七年舉孝廉授知縣未幾乞養歸

祝金

兩浙名賢錄字廷心麗水人師事宋景濂洪武甲寅父彥方同知安樂坐累謫役鳳陽金即脫

縫掖衣短後衣負貲裝往代勞役明年父邁癘金籲天請以身代父瀕死者數四絕而復甦已而父遇恩得復官遂引年致仕既歸而疾作弗能起金盡心湯藥衣不解帶者七年父歿擗踊不欲生恐傷母心扶杖啜粥治喪寢苦三年每夜伏塊飲泣比曉拭淚以事母備極甘旨時時強笑以求母歡



未幾母復歿哀毀如喪父凡父母平生所嗜終身不忍食遇忌辰必先期齋沐致祭必慟哭不食者

累日已卯分教嚴水改

江浦教諭乞致仕歸

葉繼華

松陽縣志年十六父僉解白糧洪武初軍興糧急違限輒死四子皆哭別繼華獨曰吾隨

父往設有意外吾當代哭為父以繼華年少不聽往繼華尾之而行比至果愆期將就刑繼華乞請代父適同時亦有母子爭死者皆哀號動地司刑哀之上其事得俱釋

高文景

括蒼彙紀字仲暘處州衛人力學安貧事親孝母病刲股救療顙天顙以身代既喪停柩

寢室夜半聞母大呼曰好看我文景驚須臾隣家火起文景撫棺痛哭火至舍傍而止又葺廬墓側虎夜啣瓦遺之去人皆謂孝感後以貢任廬州訓導陞潼關教授即致仕歸年九十餘鄉里稱者德



陳遂

括蒼彙紀字宜民麗水人由選貢任曹州學正天性孝友割股廬墓出於至性兩奔親喪徒步

千里嘗易己產代姪輸通負著有孝順言行錄

厲孝先

崇禎處州府志青田人少貧父被誣繫京師身往代之尋白其事父遽疾卒孝先竭力營

喪欲還柩路遠乏資悲泣不勝思自鬻其身鄉人仕於朝者聞而憐之贈以金帛始得歸葬

馬璉

崇禎處州府志字宏器縉雲人父病癰瘻璉衣不解帶焚香於臂額天祈代父歿哀毀莫任負

土築墳自程其力日致四十擔里人名其墓曰孝子

樓景明

括蒼彙紀縉雲人父疾刲股和羹以進額天祈代父卒停柩中堂居隣失火號天大慟火

隨息後舉孝廉知魏縣



鄭濂

括蒼景紀縉雲人代父往戍遼陽以不及事父望雲悲泣不置同役者呼為望雲先生統兵者

聞而憐之令代還奉養益誼及父亡哀毀成疾卒

周豪

縉雲縣志父久病醫禱弗效祝天斷葷飲三年每夕聞香拜斗祈代忽一夜夢神告曰園有烏

可療起索果得一烏為羹進父疾瘥發為疥豪日夜抑搔之其妻屢勸治生怒出之父疾復作斷葷祈禱如初疾又愈後父終無葬具傭身取直以葬廬於墓側越期而死鄉人憐而葬之從子紋事父亦孝父疾升屋顧天願代果先亡父壽竟期頤

丁愈

括蒼景紀縉雲人早喪父事母先意承順母病籲天願以身代及卒罄產營葬泣血三年貢授

景州訓導曰仲弟姪壯未室季弟業儒未官安得自享公祿迺為姪娶婦與弟貲納為典儀自少至



老無一忘語識者  
咸稱為道義之士

呂琅縉雲縣志好讀書至老不輟丞建平有德政未幾歸值父喪時方沍寒水漿不入口赤足履地

四日而病  
六日而死

周思立

遂昌縣志洪武末父閔宗畏為掾自斷其指時法當從事覺逃匿官執思立詣獄會大雪數尺思立被拷掠置雪中幾死遇赦乃求得父父意思立必死悲泣喪明思立日斂其目卒復明人

感稱孝

黃夢庚

黃夢裴

蘇伯衡黃夢庚夢裴合傳夢庚字伯明弟夢裴字伯晉麗水人兄夢

池為龍江宣課司大使以入課鈔惡繫刑部獄夢庚走京師視之會有詔省罪無大小得輸粟邊郡



自贖夢庾謂夢池曰兄罪不可測天幸有此額鵠  
家田往輸夢池持不可曰今日鵠田父母他日何  
食夢庾曰兄繫獄父母朝夕食不下咽使兄獲免  
罪歸父母啜菽飲水無不樂者兄如終不可當擊  
登聞言於天子夢池恐乃許之夢庾馳還家白其  
父夢裴欣然持券東西奔走貿白金予夢庾乃北  
行道病幾死者數達大同輸粟五百斛刑部乃議出夢池

周子輝

括蒼景紀字彥華遂昌人弟子忠永樂初被  
誣坐死罪連妻子子輝謂其妻曰吾弟死二

子尚幼未能保其必嗣若姪與其母俱死吾忍弟  
弗嗣乎妻曰以吾次子孟曉代之子輝曰是吾意  
也遂以曉往曉方十四歲慨然從命往竟刑於市  
子愛與妻愛弟二子若已生後俱長復以已產均  
分鄉人義之  
稱為伯道



李洞

明一統志麗水人舉進士賊陷郡父沒於寇洞隨官軍收復得殺其父者手刃之

盧猛

崇禎處州府志龍泉人幼盡孝道行跡甚著郡守監司上其事號所居曰孝義山

趙初

兩浙名賢錄麗水人少遊邑庠生貧力學父母以孝聞宣德間父以疾卒初哀毀骨立杖而後起苦無葬地友人吳伯昭割地與之躬負土成穴遂成疾竟不起其友牛通憐初之死於孝也并

其親  
葬焉

李儼

兩浙名賢錄縉雲人侍郎崇之子事父母承顏怡志竭盡其誠父撫廣西侍母左右頃刻不忍

離及應貢母固遣赴部家宰王翺欲授京職以母老辭曰願歸養不願仕也與金華教授又辭翺曰有此父乃有此子既居喪蔬食三年足跡不履私闕祖母楊氏久患疾儼以口吸之無難色



樊迪

崇禎處州府志縉雲人市父母承順溫清動遵古禮雖薄味必親製以進母年九十終寢苦三

年得疾事父益謹同寢處垂三十年父百有三歲歿哀毀如喪母都憲周南傳其事副使朱裳為文

祭以

黃鐸

兩浙名賢錄字仲信遂昌人曾祖道俊丞襄陽以註誤下大理祖原昭擊登聞鳴冤梟死鼓下

鐸痛祖以孝死乃建望雲庵肖像於中哭泣不輟以孝友名其堂至今稱孝友黃家

顧仕成

崇禎處州府志龍泉人事繼母孝謹母病疽吮血而愈及歿哀毀既葬廬墓三年有白兔

崇芝之祥景泰間旌表

楊泮

括蒼景紀字肇卿慶元人幼喪父甫冠補邑庠生竭力事母母病焚香祝天請以身代仍割股



療之未嘗頃刻離母側母歿數日不食二親墳土石皆躬負廬墓三載歸歸母素畏雷每遇風雨往

墳哀哭

樊澧

縉雲縣志字時遠父敬宦北京居官清苦澧履艱歷險備盡孝養父歿哀慟成疾而卒著有永

思錄

季叔明

慶元縣志字正吾官無錫丞母老告歸母卒哀傷絕食而殞當道旌其廬曰純孝

湯成大

景寧縣志事母孝謹妻潘氏少拂母意黜之母年漸老雙目俱瞽日為梳洗澣滌問寢視

膳年七十無懈母壽九十卒

葉志

遂昌縣志字希尹母病割股以進後志病篤子尚木亦割股以進孫克芳方九歲亦割肉療母



人稱  
世孝

單槐

崇禎處州府志處州衛人事母盡孝連貢母年七十依依子舍不忍離母病躬親湯藥日夜忘

寢致右目失明冒雨渡溪延醫失足水中得漁人救不死子熙載陳州同知有父風

張處重

兩浙名賢錄景寧人父伯澄以誼誼被逮檄至度不能免欲自經兄弟四人皆傍徨無措

處重年二十獨毅然曰事雖難脫顧可坐視父刑乎囑其妻周氏曰我往必死汝當善視吾親撫吾子也言訖就逮竟死於獄周氏

刻苦自立終全晚節人稱孝節

吳翺

括蒼景紀字存翔景寧人成化丁亥母陳氏遽疾越明年疾且劇百為不療計無出翺忽晨起

悉以家事屬諸弟若有事遽行者質質而出衆莫測其意至暮扶憊而歸喘息仆卧出肝肉寸討付



諸弟衆方詰之曰吾度母疾不可治走謁神祠剖  
胷取肝以香爐中灰塞血穴血出不止遂昏然無  
所省比覺日已向夕蓋既夕而復甦也遂割  
肝內糜中母食之疾頓愈聞者為之垂涕焉

梁祚

潘琴孝感記景寧人母終未葬成化間洪水暴  
至衆競挈資具以避祚獨念母櫬未舉號泣徒

跣躬往攀扶漸水深不可立顛踣幾沈沒者數四  
祚盡力以必濟為期既而水勢盤旋若有推而助  
之漸入堂奧得一樓梯為固乃號於人曰母櫬可  
以無虞矣既而檢其家具所漂失者亦甚無幾衆  
咸異之

王葑

續處州府志字德敷麗水人嘉靖己未進士觀  
政刑部接丁兩憂廬於墓側者五年跣步不入

私室致有馴鹿之瑞竟因  
哀毀遭疾而終入祀鄉賢



易文

續處州府志字宗周處州府學生天性至孝學使屢旌之因父以中風卒於浴盤終身不浴者

三十年由貢仕至  
益府教授以壽終

吳一鵬

續處州府志遂昌人年十七同巷失火一鵬在外念母奔回家已在烈焰中狂號欲入人

以火勢甚熾殺身無益力挽之一鵬曰母死何以生為挺身而入火斷出路母子俱斃有司白諸當

道建坊  
以旌焉

李正蒙

崇禎處州府志字汝明縉雲人萬曆庚辰進士禮部儀制司主事考滿當選以父老乞終

養先意承志十餘年如  
一日著有白華樓集

潘沆

崇禎處州府志景寧人謹厚業儒凡詩文過目成誦事母甚孝冬必以身溫被母卒家貧跣足



營葬結廬於樹守  
之子琴成進士

徐鼎臣 崇禎處州府志字忠弼松陽人總角時母有  
危疾頷天封股幾絕母卒不能起號痛廢寢

食服闋補弟子員以扶父櫬  
於京邸勞瘁而卒人稱其孝

鄭賡居 舊浙江通志字而名號寶水縉雲人少以聖  
賢自勵天啟丁卯舉於鄉事母極孝一舉動

必稟命晨昏愉悅如孺子執親喪水漿不入口三  
日葬則躬營土石所著有讀易菟春秋引斷質疑

語林  
諸書

## 國朝

王家較

題旌冊雲和人康熙十三年耿寇掠鄉邑父  
王產被擄燒身索金帛將斃家較直走寇所



哀懇求代寇乃解父索繫其頸家較割衣一幅剪  
髮一縷授父曰兒必死以此寄兒婦為他日遺腹  
作念寇挾之行至泰順遇官兵得釋歸見父相持  
號泣事

聞奉旌

浙江通志卷一百八十六



欽定四庫全書

浙江通志卷一百八十七

人物八

義行<sub>上</sub>

周官六行孝友之外兼重睦婣任恤蓋好義雖由性生亦感乎於風教然也兩浙義門如會稽裴氏浦江鄭氏皆足樹範鄉閭流芳簡策況生逢

聖世德教翔洽孰不喁喁嚮化以成一道同風之盛也



歟志義行

杭州府

晉

孫拯

晉書陸機傳拯字顯世吳郡富春人吳平後為  
涿令有稱績陸機既為孟玖等所誣收拯考掠

兩踝骨見終不變辭門生費慈宰意二人詣獄明  
拯誓遣之曰吾義不可誣枉知故卿何宜復爾

二人曰僕亦安得負君拯  
遂死獄中而慈意亦死

南北朝

范叔孫

宋書本傳吳郡錢塘人少而仁厚固窮濟急  
同里范法先父母兄弟七人同時疫死惟餘



法先病又危篤喪尸經月不收孫悉備棺器親為殯埋又同里施淵夫疾病父母死不殯同里范苗父子並亡范敬宗家口六人俱得病二人喪沒親隣畏遠莫敢營視叔孫並殯葬躬卹病者並皆得全鄉曲貴其義行莫有呼其名者孝建初除竟陵王國中軍不就

范元琰

梁書本傳字伯珪錢塘人家貧惟以園蔬為業嘗出行見人盜其菜元琰遽退走母問其

故以其實荅母問盜者為誰荅曰向所以退畏其愧恥今啟其名願不泄也於是母子祕之或有涉溝盜其筍者元琰因伐木為橋以渡之自是盜者大慚一鄉無復草竊天監九年縣令管慧辨上言義行揚州刺史臨川王安辟命不至十年王拜表薦焉竟未徵卒於家時年七十

五代



褚雅

茅山志字元道錢塘人梁末隱句曲山中輕財重施拯物無厭營田若熟以乞貧者與人共居

常早起灑掃取水徧以周給覓薪薪乞人夏月種瓜任貧人來取不計也

張儼

咸淳臨安志餘杭人好學有賢德不樂榮利嘗開圃種瓠以所貿錢造橋俗謂葫蘆橋

宋

焦中山

海寧縣志鹽官人素好義自雍熙四年尸祝許睢陽至天聖九年遂捨地祠張許並塑其

像時王可回曰中山一邑義士因名其坊曰忠義

俞舉善

成化杭州府志錢塘人異世同居號義門明道二年旌表門閭

葉曙

西湖游覽志餘字呆卿錢塘人授桂州司法家故饒財諸弟盡用之而求異籍曙喟然曰家事



至此繇吾祿不足以聚親族耳汝曹何咎在桂有  
吳謚為象州武儀令而死其妻孥二女歸闕至桂  
而妻又死曙哀其無

歸娶為二子婦焉

何押錄

夷堅志餘杭縣吏自壯歲為小胥馴至押錄  
持心近恕畧無過愆前後縣宰深所倚信又

兼領開拆之職每遇受訟牒日拂旦先坐於門一  
取閱之有挾詐姦欺者以忠言反覆勸曉之曰  
公門不可入所陳既失實空自貽悔何益也聽其  
言去者甚衆民犯罪屢於徒刑合解府問傾其情  
理非重必委曲白宰就縣斷治其當杖者又往往  
諫之使寬嘗置二竹筒於堂時擲三兩錢或一錢  
於筒中諸子竟不深曉迨謝役壽終始告之曰吾  
免一人徒罪則投一光錢於左筒免一杖罪及論  
解一訟則投一糙錢於右筒剖之皆充滿無餘地  
遂卒後十年子鑄登儒科紹興中位至執政累贈



其父太

子少師

蔣崇仁

西谿梵隱志杭郡人居興德坊喜賑施每秋成諸穀即湧貴如元值售之且聽糴者自量

或捐與饑者終時屬二弟力行好事里人德而祀之

元

賈執中

海寧縣志字希賢與弟用中並負俠好施承父志建義塾於家奉先聖像配列諸賢後立

講堂附從祀主備禮器倉庾庖湑所儲經史百家言副贍田八百畝聘名師誦之教其邑之子弟隣

邱之士聞風而來相與講義洽聞咸取其於此至正十八年事開授執中山長枯蒼劉基有義塾序

賈用中

萬歷杭州府志執中弟海寧州黃岡人捨田百畝入儒學州牧上其事於郡先是州之人



士未始有與計偕者已亥  
賈二子祥麟祥鳳俱中式

馬宣教

海寧縣志宣教以行稱萬十一其先汴人宋  
靖康間扈從南遷徙居鹽官黃灣里煮海致

富值歲浸萍滿丁將散去宣教出粟賑貸猶不瞻  
變產殖以活之已而家益饒與黃岡賈氏兄弟並  
以貲甲一郡復起樓聚書萬卷延徐一夔貝瓊諸  
名儒教其子弟亦同賈氏義塾云時元末兵起張  
氏據吳方氏據越所在殘破而靈泉  
一鄉獨全則宣教保障之功居多

何宗實

楊維楨何宗實墓誌字誠甫其先由東平徙  
杭遂占籍為杭人仁孝慈愛所得俸奉母外

以單於族兄宗茂同居無間言妹一人適戴氏戴  
沒給養其家子女為之嫁娶隣婦有哭甚哀者問  
之喪其良人貧無以治棺即賻之他日婦至  
請傭以償直曰周汝急豈望報乎婦謝而去



朱景仁

兩浙名賢錄海寧人事父母以孝聞待宗族煦然有恩外嫻亦如之交友敦相恤之義元

季四方衣冠之士避地海寧者景仁悉解衣推食與同甘苦屢徵不就自號貞白道人

明

朱燧

杭州府志字質夫海寧人父圭以明經起家嘗捐腴田以益學廩宣城貢師泰知名當世至正

末道祕居寧之北郭燧具舟迎歸其家後貢卒燧為經紀其喪捐地以葬別置田供祭明初會詔興學杭州辟之講藝錢塘侍御史薦於朝除粵東寧遠令

柴望

成化杭州府志字宗禮錢塘人為樸茂見義輒為有友枯蒼金觀者前元某州學官退居錢

塘母沒病不能葬以哀毀沒而其妻繼殯望哭曰吾友之不幸至是哉且子孱弱三喪在前吾責也



乃捐貲治葬事及告於觀所常往來者因得舉  
從其先兆葬焉人義之徐一夔為作義行記

孫適

萬厯錢塘縣志字孟傳博覽羣集有詩名孝親  
友弟弟迪官禮部少與翰林王洪善洪家貧親

老祿薄不給適周之始終弗渝善行草尤精於  
素問鍼灸之術隱居甘泉里有東巖老人集

劉均美

西湖游覽志號閱耕錢塘人世以醫名讀書  
通大義待異母弟如同母讓產悉與之洪武

間以間右徙實京師仍以醫行喜居善藥售不二  
價人喜施故四方持重價走均美市藥者日無算  
而貧無錢走丐藥者亦無算均美旦起視丐者先  
之而後及市者郡人許昉遊國學貧無以自給均  
美延之家昉死為之殯  
斂歸其棺年九十而卒

盛濂

張允修盛濂傳於潛人天性至孝親病歿哀毀  
幾絕兄弟五人濂居長教之耕讀終其身不分



析比閭族黨間雍雍如也宣德四年邑大荒濂出粟六百石賑濟全活甚衆輸金築黃泥堰溉田三

千餘畝建青檀橋濟人徒涉復置田為修葺費以垂永久

胡瓊

杭州府志號靜菴臨安人正統間有皇木之役前此有以是役破家者時歲大饑民不能完公

費繫獄者衆瓊輸已資五百金以完其役里民德之

吳思敬

餘杭縣志餘杭人好周人之急正統六年發穀一千五百石賑濟饑民奉勅旌表

夏誠

成化杭州府志字與誠鄞人徙居仁和勤儉喜施而尤敦於族隣姻故婚嫁族孤子女殮葬親

友之貧者十餘人遇歲儉每罄所積以貸無所責償復值大侵饑餓盈途誠計家所餘米千餘石歎

曰豈忍一家獨飽哉乃盡出以助官賑部使者以聞正統七年錫鹽書羊酒復其家仍勅有司為樹



門湖州墅居人自其先已冒官河禁傳之子孫無  
覺者後有覺而陳之官將悉逮理之誠一言釋千  
數百家之離析信義行於鄉為不善每有懼誠知  
而中輟者鄉以司直稱長子醇亦以義輸粟授冠  
帶官

陳昊

萬歷杭州府志字宏夫仁和人初贅顧氏生子  
鑑妻亡昊年二十五人勸其繼娶昊曰吾實有

子以承祀事忍復求偶以負吾妻耶有  
兩女弟皆貧而發昊為周給之甚厚

蔣暉

成化杭州府志字廷暉錢塘人重友道一時同  
事貧不給者居停周給其有歿者復為殮殯歸

其柩且為經紀其後而已與妻子不免饑寒弗恤  
也黃養正姚震咸有學行在謫戍中暉辨其寃後  
皆至顯官暉平生惠利人未嘗有所責  
報亦未嘗以語諸人故咸以長者稱之



孫顯宗

富陽縣志字存義惠愛霄井村人成化甲午遭歉歲殍夫塞途捐粟二千石以賑鬻子女

者贖之稱貸者贈之賴以存活者不可指數事聞召至闕下欲官之堅辭乃於光祿寺賜宴授正七品冠帶遣還既而復命地方官告送其孫景南以諸生入鴻詞選顯宗欲其子若孫自以勤勞致富貴率景南陞辭乃已於是降勅旌表為尚義之門樹坊當道

王斌

舊浙江通志臨安人成化二十一年助穀八百石賑荒三院題請勅建尚義坊賜以冠帶

吳定遠

萬厯杭州府志錢塘人嘗於湖州墅孔公銓家買客柏油五十石計直當百金立券三日

發油半月歸直券成次日客寓火吳率人往救之至則油室已在焰矣客哭曰油故假本於人今何以償之有死耳踊躍欲赴火吳急抱止之曰油既有成券即我貨矣若何與半月後來取值耳客稍



未信吳因與俱歸數日即措銀如券歸之客拜祝  
曰願公生貴子以報德泣謝而去吳後生子瓚登  
進士官至

通州守

董慧

海寧縣志字如魯富而好行其德景泰甲戌歲  
饑輸穀四百石成化癸巳海決民流又輸六百

石丁酉大饑又輸千石有司例授以承事郎強之  
冠帶力辭又輸千石以為備荒計其他置義田葺  
文廟掩骼建橋諸善事未易枚舉

程瑞

杭州府志號栗夫臨安人性孝友崇理  
學捐已地為父廟壽九十三詔賜冠帶

馮悅

萬歷杭州府志字景和錢塘人弘治中有緡雲  
施三二者以讞訟於憲司桎梏抑歸有所攜二

百金懼為途人所侮托寄於悅家施歸而卒其子  
不知也久之悅呼其子雲還之封識如故雲欲讓



其半悅  
不受

翁鍾

吳遵晦翁鍾傳字子聲仁和人  
事繼母如所生有族叔亡其室貧不能自存鍾養之仍周旋其

子女尤親禮貧交急患難厚施而不責其報備有  
竊鐘金聘其妻者妻家悔婚願歸所竊鐘惻然謝  
無有凡環鐘里居者千餘家饑取食寒取衣婚姻  
死葬取經費俱不置券即有券而人負之固不較  
也一時賢士大夫重  
之號為西泠君云

俞鉞

臨安縣志好施與嘉靖初輸粟二百石濟荒  
助濟西湖銀五百兩撫按上其事贈承事郎

歸溪

陳昱

丁仕卿

萬歷杭州府志溪字源之錢塘縣南良里人前仁錢兩縣

額辦馬價計每丁出銀二錢有奇溪陳牒臺司請  
均之各邑奔走經營罔恤勞費嘉靖癸巳杭守婁



志德為議丁祇徵銀一分七釐九邑均無贏縮民  
省重賦又錢塘陳昱西壁人以兩邑僉報總甲之  
役擾民陳牒分巡康朗康下之邑議覈戶貧富定  
為上中下法多寡徵銀催募充役均稱便焉又上  
虞人丁仕卿寓杭為東里坊之社教請見會城之  
民憊於夫宿亦投牒當路謂官夫百七十名足備  
搬遣夜巡之役既戶出間架錢以召募總甲火夫  
而復差及保中俾民財力兩敝請俱罷免事下諸  
司議徵巡員役以不便其私許仕卿撓亂成法聽  
者不加深察嚴行箠楚枉枯回越者三矣萬曆二  
年仕卿仍來杭陳請再下兩邑議咸是之自是前  
兩役悉就蠲除又慮歲久法弛更陳牒督府徐枋  
樹石垂遠錢塘陳善  
合三人為之論贊

沈璋

丁養浩沈璋傳字廷器號存濟仁和塘西人  
生平慷慨好施塘西為省會巨鎮水勢直瀉自宋



元以來民居聚散不常堪輿家謂宜於清流亭舊隅建傑閣以當水之衝璋即捐貲就古清流亭舊址開基構材建千佛閣高二十餘丈立殿宇禪堂鬱為叢林貲貲以萬計里中賴以安居正德己卯歲大侵璋煮粥飼飢民越兩月全活無算又發廩米四千餘石以貸貧者次年大熟人俱倍息來償堅却之曰吾以周貧非以邀利也焉用償於是鄉人咸稱為孝義沈家子哲合州司馬孫修山東右布政

徐江山

錢塘縣志字六橋正德辛巳進士官尚寶卿性耿直敢言夏言與曾銳受禍無敢白其寃

者江山首上疏申救陶仲文段朝用以方術得幸江山力辨其奸雖數觸上怒然心知其不阿勿為罪又馮恩繫獄中子行可刺血寫疏自縛闕下江山力贊通政為引奏得末減其好義如此



應明德

杭州府志字養虛海寧人嘉靖癸丑進士授刑部主事時楊繼盛奏劾嚴嵩十罪五奸有

旨先下鎮撫司拷問究主者嗣發緹帥杖一百送刑部擬罪楊瀕死再蘇提牢昏奸黨也明德獨檢湯藥視飲食者十四日復說尚書出之老監還於外庫或誅以重禍勿懼也

錢科

錢塘縣志科敦行尚義嘉靖間連歲汴饑當事設法勸賑入粟五十石者附學入監時科已出

貢捐賑獨多巡按舒汀提學孔天允特請照景泰例已冠帶者陞其級授正六品職不支俸科又自設粥廠拯濟里民所居近渡船埠後架木橋徑曲險濘多溺者科特闢所居屋直衢達河且甃石為大橋行者德之稱南橋以別於橫河東西二橋科後遂以南橋為號更名其橋曰萬安

吳元良

兩浙名賢錄字子匡錢塘人性樂施以節俠自喜父沒遺券數十紙中屬杭人者計資可



千餘緡元良悲召其人語曰吾書生雅不習收責事諸君各取券去有固卻者元良勉之曰無庸俟若盈時割餘以佐我酒貲不後也皆感謝去其外屬吳人者貲略稱是元良不知其家特造吳市中焚之語市人曰願傳語鄉閭有負杭吳長公責者吾已焚券無煩歸直也時華亭徐相國階督學兩浙獨高元良奇士厚禮之而元良裁謝外一不涉干請亦未嘗以此矜於人

傅昇

舊浙江通志號竹亭錢塘人明經授王官淮安馬試無子娶妾嫡不容以贈昇昇辭不得有妙

失明不字昇即以其妾與同寢處試妻亡昇仍以其妾歸試後生二子初胡給諫麟謫台幕其子將之台寄二筍於昇子竟溺於湖後昇取二筍還麟封識宛然如故

郭文範

黃汝亨郭文範傳號型伯海寧人與弟友愛族子有鬻身為人隸者贖還之迎養寡姑與



繼母同居者三十年邑之倉大使翁煌者虧糧坐法將鬻已女為妾文範輒輸金與贖魚資給歸之金陵更代償徽人吳兆大百金及廩無告老吏陳邨五年而沒曰於我殯凡里族故人之不能婚葬者時時給之慮弗逮晚年作生誌自號蝶翅子

董欽

餘杭縣志少敦孝友好施與祖父遺資悉公之族黨萬歷十五年間歲侵饑饉載道米價湧

至一兩八錢發米三千石以賑之全活甚衆三院題旌立尚義坊於縣治之東南又安樂塔關一邑文運欽因顏圯特為改建增五層為七層稱一邑壯觀又建文昌閣橋於南渠河以聚秀氣年八十五終子汝洲紹述父志乾嶺地僻往來嘗患虎盜為建亭觀俾人有依庇濬築龍潭便一方取汲

陳灼

杭州府志冒化人國子生豁達好施赴急困然諾無苟萬歷庚戌有司議造飭學宮方捐俸倡



助無應者灼慨然請於令一切身任之凡費二千七百有奇旬月告成及歿祀鄉賢祠

周榮

富陽縣志號平齋少孤兄某主家政兄死始操家務見子錢契券年稍遠者累數千金數曰由

園亦足自給何必營營為作三布囊束於卧樓之梁或持鏹償者告曰舊契已毀不取矣萬厯戊子歲大侵煮糜十數缸陳於恩波橋以食餓者數月不倦或斃於賑所即為棺殮之

陳中漸

舊浙江通志字風山海寧人為名諸生喜周人急所貸予嘗焚券不責償市有持膺銀行

哭甚哀問知為里僧所欺即自探懷中銀如數與之有丁氏鬻房產既受價徙矣復據之中漸憐其貧為更授價及割他產予之有韓太史者嘗負中漸債已死其妻齋錢幣請償中漸謝不受某氏女生怨家誣讎不能自明中漸挺身御史前白其寃年五十五卒子與郊與相並中進士贈給事中



周柯

杭州府志號一巢富陽人樂於為善遇歲歉捐粟賑饑有疾疫拾醫藥棺柩寒即施衣饒人有

急難多方周濟間有鬻妻質子者必傾貲贖之里人共推為長者

俞良謨

海寧縣志字龍淵好陳民間利弊一議甦鹽窳之困一議豁解役之繁為公事破家沒齒

無怨寧民利之

闕大生

舊浙江通志字玉門錢塘人性任俠家致千金隨散去戚黨中多賴以舉火里中貧兒負

急債欲鬻其妻大生代償之使復完聚有中年患替不能治已去為丐延至家療之替旋復明冬寒

大雪親煮粥分給全活無算

吳憲

舊浙江通志錢塘人性謹厚喜義舉初徽商子弟不得與杭州試憲力請於巡鹽上疏報可乃



立商籍得入泮於府仁  
錢三學如民籍之數

徐季韶

杭州府志字鹿園海寧人父輅與歸有光陸樹聲為同年生季韶偕兩弟維揚繪觀肄業

南雍時人目為三俊戊辰海嘯漂沒數十萬家隔江浮棺若鳧雁之集季韶斥腴田數十畝瘞埋之辛巳歲大侵沿塘設粥賑十五所日費米三十斛又開藥局救瘟疫存活甚多

吳元溟

錢塘縣志字澄甫市繼母以孝聞女弟少寡無依迎養於家終身無間言故人程生員課

千金久繫元溟即代償之崇禎庚辰歲大飢出索金往江右糴米五百斛悲散於親友與同郡王道琨華亭陳繼儒嘉定黃淳耀交俱有終始授光祿丞年八十二卒

沈起虬

王一奇

舊浙江通志起虬字幼良仁和人崇禎辛巳歲大饑鬻產市穀以賑



有負漕而鬻女者代輸漕而還其女同里王一奇亦發穀三百石以賑飢隣家為官債所迫計鬻妻女將成券矣王又代償三百餘金竟不責報

王錫宸

鄉賢留祀冊昌化人天啟七年官霍山知縣念父乞歸仁厚樂施嘗捐金倡率族人立祠

沙干以奉祖先歲時烝祀無闕宗黨姻戚時有所調予未嘗與貧佃較鉢息崇禎十二年遇大侵出穀百餘石賑濟又每石減糶如常歲里中賴以存活者甚衆又置義塚地於橫溪橋

國朝

康熙十一年入鄉賢祠

章希義

鄉賢留祀冊富陽人慷慨好施天啟中浙東大饑盡發所儲原粟分給飢民賴以全活者

甚衆宗族有不能婚嫁者為之捐資擇配不能就學者設義塾以教之代出修脯里中有爭鬪者必



曰寧為刑罰所加毋為章公所短  
國朝康熙十五年入鄉賢祠

嚴武順

鄉賢留祀冊字訥公餘杭人太常大紀次子明季辛巳歲大侵武順力請當事勸里中大

姓賑粟更經畫賑法俾官不煩而民普濟全活無算  
是時山寇蜂起戶不安枕武順謀於邑長督修武備富者出財壯者効力延智勇士以保疆圉或難之武順曰富者出財非散儲也正所以保其富強者出力非藉捍也先令其不為盜已而邑藉以寧三世同居家庭雍睦

國朝

順治十六年  
祀鄉賢祠

陸奇

鄉賢留祀冊錢塘人崇禎壬午舉人仁心為質輸粟賑饑多所全活建議修築海塘破產獨捐

千金重建鎮海樓尤多隱德遇色不亂解冤獄却暮夜金贖人婦女有客寄資旅亡道梗閱三載後



國朝 招其子付之封識如故  
康熙二十四年入祠

國朝

周之官

公舉事實字待玉號純卿世居仁和以孝義稱父同氣五人皆友愛不析產人謂之義行

周氏之官性好施與樂善不倦前明庠辰省會大侵之官出家貲賑粥活人數千人子七人同居共

饗者四十年歲稱棣萼堂周

王兆京

鄉賢留祀冊仁和人素封與兩兄析產盡以資財讓其兄明末賊縛其兄子去是時產

已罄無資為贖即走賊巢類以身代賊取火灼其體無完膚曾道拾遺金坐守俟失者至還之御史

表其廬康熙六年入祠



邵泰卿

舊浙江通志字九卿錢塘人經邦曾孫明崇禎辛巳浙大饑泰卿為粥以濟全活甚衆鄉

賢留祀冊族人棺久暴者泰卿捐資購地瘞之頗所居曰樂善堂以子遠平貴封如其官康熙二十

四年  
入祠

童金焰

公舉事實於潛人父病禱天祈以身代父病果愈弟早歿撫遺孤如已出性好施予崇禎

間歲飢饉輸粟五百石全活甚衆又邑中橋梁義渡凡所修建者三費皆不下數百金行人往來稱便

項大章

舊浙江通志字孟炎錢塘人明崇禎辛巳浙大饑為粥以食餓者同里有負國租將鬻其

妻大章捐贖代輸無德色以子景襄官封弘文院檢討康熙二十七年祀鄉賢



何爾彬

鄉賢留祀冊於潛人順治三年拔貢歷陞禮部祠祭司主事潛邑處萬山中自縣南四十

里七坑尤險窄峭壁五十餘丈直矗溪中其下小徑盤曲幾二里許行人往往失足彬鳩工築砌竟

成坦道遇旱災蠲穀倡賑人賴以安有姪十餘輩教育如已子親族待以舉火者數十家邑中重構

學宮獨建兩廡

顧景祚

鄉賢留祀冊錢塘人順治丙戌拔貢任壽昌學博當兵燹之後宮牆傾圮捐貲修葺設立

義學請增廣額改小學為中學致仕歸有鄉人負債鬻妻者出貲代償老友乏嗣贈妾續後凡善事

靡不為之

孫伯玉

鄉賢留祀冊字美之富陽庠生孝友嫻睦輕財好施每逢飢歲輒發粟賑濟窮民賴以全



活者無數順治初年山賊竊發所在剽掠邑令朱陞臣素知其急公好義屬以撫輯賊寇伯玉即持憲檄宣布德意賊聞俱釋甲倒戈投誠分散內有飢寒切身不能存活者請發公帑散給之并竭家貲相助

陳之閭

海寧縣志字希亮海寧人候選兵馬司正指揮幼失怙恃躬以禮雖燕居僕妾在御無

惰容佞色遇有大興革及調遣徵發當事諮詢必抗言不阿並洞悉利弊切中機宜邑中頻經荒旱指困賑饑必首倡焉或躬親散給毋令冒漏又寒者製絮襖施之流離者廩給之亡者給棺斂之歲以為常復於西門外捐地為義塚

毛應鎬

舊浙江通志字叔成仁和人少孤母攜五百金挈應鎬往依族之分尊者既而不歸所攜



母欲往詢應鎬以為尊行也且拊我久勸母勿言族有兩寡嫂迎養終身有貧不克葬無居址者悉為經理年八十一卒杭州府志子先舒好學有文名

### 高允中

鄉賢留祀冊錢塘人先籍餘姚遇饑歲立粥廠於里門全活甚衆施棺掩骼交親貧者有

所乞無  
勿應

### 吳烱

錢塘縣志字睿思四歲母病不食烱號呼亦不食及母病稍瘥始進食一時競傳為異年十五

家遭誣烱奮身庭質巡撫蕭起元趨之遂得白順治庚子歲飢烱條議令十里置一局局設數村且捐貲為倡民不告災又嘗上巡撫范承謨七郡水利書凡萬餘言又代償粿民賑佛鬻妻金皆義舉也



許日章

海寧縣志字寬生海寧人幼至孝父與母病疫封股以進皆立愈稍長銳意讀書經史無

不成誦性好施予戚族中不能葬不能婚不能舉火者賙恤無筭偶入城見桎梏而呼號者數百人問其故乃欠官糧者約三千金歸即傾篋倒篋盡捐所有不足更轉貸以輸之買僕知衣冠後不責償更贈資使歸獲胙篋者素識其人贈金勸使改過以子汝霖貴歷贈光祿大夫禮部尚書

陳之閣

鄉賢留祀冊字始升海寧貢生封光祿大夫幼失怙哀毀盡禮奉母避亂盜掖之入巢委曲

勸諭盜竟解散每遇歉歲率先煮粥以賑流離樂善好施族戚里閭咸頌其德與人交有終始遇失言愆儀輒而折之延師教子孫儀意兼至卒年八十八康熙四十九年入祠

顧伯揆

公舉事實號一齋海寧人少孤貧讀書勵行繼母王盡色養事兄恭敬垂老無間言體



先人友愛之意分授堂弟田畝俾得耕讀親知不能自存推解無德色晚年子悅履督學山左迎養官署適常歲命捐俸施賑全活甚多以悅履貴封如其官

童養庶

鄉賢留祀冊昌化人持躬長厚處衆謙和捐貲修理學宮建文昌閣歲旱蝗救濟貧人甚

衆鄉里中死無所歸者買棺斂之貧鬻妻者捐金止之親友子弟有志誦讀者給以膏火勿吝

汪以澄

鄉賢留祀冊仁和人任刑部陝西司郎中居鄉多義舉嘗捐置祭產周卹親黨凡貧不能

葬及壯未有室者悉資助之賑飢施棺修學宮補祭器夏施蚊帳冬給綿衣濬川渠葺橋梁砌道路善行種種舛貧困守節餽膳金五十載不廢

何嘉諫

鄉賢留祀冊富陽縣庠生性尚義道得遺金係本邑蔣生鬻產完糧者立即還之至施棺



木瘞遺骸散較賑貧善行不可勝計友人胡紹宗疫死無所歸為殯殮其家數口族人有三世骸骨

暴露者捐資購

地為合葬焉

裴傲誠

鄉賢留祀冊錢塘恩貢生性孝友母歿結素綬於柩側題曰永思廬伯兄早逝撫其遺孤

成立人有急難叩其門即素不相識者必竭力以濟積逋數萬緡悉焚其券不責償遇鰥寡困乏者

歲計所需給之至施藥治病掩骼埋胔行之四十年不倦以字充美官贈御史

姚殿岳

鄉賢留祀冊字鎮公仁和人家家貧教授生徒事親孝養備至親卒獨力完喪葬并葬親族

之不能葬者七棺兩次拾遺金俱候之以還失者昨三十喪偶義不再娶

孫有威

鄉賢留祀冊餘杭人務篤行每逢歲侵出粟賑饑免租貸息取貧者券悉焚之然諾千金



不易

葛道明

徐元正葛道明傳字元亮仁和人幼儻善承先志厚待宗族七世祖後子孫蕃衍咸為

堪輿所感多浮屠未葬道明毅然獨任卜葬二十餘柩同學江我正構重獄道明營解得釋與人交然諾不苟見義必為子寅中武進士選侍衛康熙四十四年道明年八十三恭逢

聖祖仁皇帝南巡跪迎道左  
賜元寶蟒緞卒年九十

周麟

舊浙江通志字渭濱錢塘人年十五母得奇疾三月不卧目為之青入山遇老翁授以藥草疾

始愈歲饑經畫賑濟推解親族甚衆子禹吉博學能文

張鍾發

公舉事實字會生錢塘人兄弟三人鍾發以已身子女無多父遺產纖毫不受客遊新昌



遇鄭逢可夫婦負債鬻身即解索代償更給資令其謀生有故人于沈國器早年聘金氏女孤貧未能娶出五十金為之婚康熙四十七年客遊嵎縣適歲侵鄉民乏食即輸百金為倡更勸同遊及本邑富室捐貲煮粥饑民賴之施藥施棺樂善不倦壽八十有五

### 高鳴鶴

公舉市實富陽人歲貢生授樂清訓導幼年自塾歸道拾遺銀十二兩揭單招失銀者隨後有浦江木工陳君德至驗明給還及長孀王氏無後欲繼鳴鶴為嗣鳴鶴以非應繼力辭及孀歿鳴鶴曰吾義不當繼而婦氏厚意不可殺乃置田供祭祀捐修文廟購參連製藥施病疫者全活以千計遇歲歉貸窮民穀石及年豐穀賤止取原借斗石不計其價力不能償者即焚券不復索邑有蔡某窮困借銀經商日久虧折無抵鳴鶴鬻已產代償之至施綿衣施棺木歲以為常



沈萬祥

公舉事實於潛人慕義好施出有貧不能婚喪者出資相助有負債力不能償者即焚其

券火延族人十餘家撤已屋居之并膳給馬每遇歲飢出粟助賑有客死於途者為具棺殮造義塔

於排嶺頭馬塢庵等處分別男女收藏齒豁邑當江浙接壤行人往來不絕洪水泛溢橋梁盡圯重

建新溪渡創木橋置田畝房屋以為久遠計重修馬谿橋亭口橋觀正橋鳳凰橋太平橋及天井潭

之景坑橋雙溪口之泥鍾橋復於路口建亭施茶湯冬夏無缺前後邑令皆給匾以旌其義舉鄉飲

大賓

姚際晉

公舉事實字錫蕃其先自休寧徙錢塘歲貢生母疾刲股和藥以進遭父喪哀毀骨立墓

在新安歲時展省往返千里率以為常讓產於諸兄已僦屋而居後諸兄中落猶子婚喪悉為經紀



撫其藐孤如己子性樂善好施凡成梁治途皆縮  
衣食為之而不喜近名如施藥餌則托之醫者施  
祭禩則托之友朋捨棺木則托之隣姓居鄉謙抑  
年八十子孫皆登科第猶徒步出入以子之駟官  
封翰林院編修弟際恒字立方仁和諸生篤學有  
大名著九經通論百七十卷庸言錄二十四卷

周垣

公舉事實字興衛仁和人年十一山寇竊發隨  
伯兄奉母避居蕭山之金家塢寇至與母兄相

失垣獨攜幼姪竄澤莽間晝伏夜行越數日得達  
母兄所姪賴以存及析產兄子四人各使倍已之  
半創建宗祠刊祖訓家規於內俾子孫世守其法  
有貧士館於家病不能歸留療之五年終不起乃  
厚為殮葬恤其孤而歲給之家設藥局施病者遠  
近悉至凡三十年無倦色戚黨賴以舉火者不可  
勝計比鄰有以所居請售垣曰吾親見其由址構  
以迄落成吾焉忍居之乃給其所請之值而還其



產子霽症正庚戌  
殿試第一官修撰

陳克鑑

公舉事實字于人海寧人工部屯田清吏司主事寧邑學官肇自有宋雖代加修葺然閱

歲既久漸不能支克鑑慨然身任不惜重貲捐已產設義塚骨塔於本邑十八都收瘞無主遺骸中表閔飢度物故無嗣為理葬事三喪並舉族人陳亦堂客死都門醫藥殯殮悉為措置復歸其旅櫬陳泰交中年未有家室憐其宗支欲絕力為婚娶孀婦及金氏餬口無貲給還伊夫所嚮產至於歲荒施粟冬月施衣病者施藥死者施棺種種善事率以為常

姚士章

公舉事實字斐成錢塘國子生居家孝友好行其德康熙甲寅乙卯間值閩變浙東婦女

有被寇掠者士章為設法代贖使得完聚計二百餘人仁錢兩邑獄舍卑濕犯人易染疾病士章請



於官獨輸金改造又施粥給絮屨歲不絕當事稔其賢會建有嬰堂令董其事士章經理歷十二年費不足輒解囊給之無少吝省城貢院大門外舊無蓬殿諸生應試候唱名者咸集於此雨淋日炙無所憩息士章始捐貲創葢迄今遂循之不廢

吳維楨

公舉市實字左廷錢塘人性孝友好施予人有緩急呼之輒應未嘗有德色於宗族尤如

厚歲裝綿衣給貧者以為常康熙甲寅閩逆煽亂民間子女被掠多索金取贖窮民無貲者呼號載道維楨立捐千金為好義者倡俾得完聚市平制府李之芳特獎與馬生平立功過格日書以自警晚年作自述二篇遺誠子孫壽八十六以子炳官封國子監學正

許頤齡

公舉市實字友期錢塘國子生其宗族居新安遷杭者甚衆頤齡多方提携貧不能婚葬



者助之家素業鹽其友彭吉先許忠京負鹽帑力不能完頤齡倡捐代輸無吝色

**楊士雅**

公舉事實字晉彥錢塘人康熙戊午武舉居家孝友親族之貧者咸周之戊子秋禾中程

生來杭應試卒於逆旅貧無以殮士雅捐貲治殮且歸其喪嘗買一婢係所知者女詢得之即令其

歸不問值

**葉正榮**

公舉事實字仁則錢塘人性至孝父罹瘋疾衣不解帶藥必親嘗數載如一日養母先意

承志母喪年已五旬哀毀骨立水漿不入口哀感行路兄弟五人同居共爨正榮秉家政毫無所私四弟早逝撫孤姪如己子於里黨親族間周恤無倦張歐氏早孀無子正榮資其衣食者三十餘年嘗客遊開陽途遇錢吉甫負債鬻子即解囊代償完其父子又親故朱龍若年老無嗣買婢贈之龍



若亡復撫育遺孤俾成立焉壽至八十一而終

方子泰

公舉事實於潛人好周急施予歲大飢出粟以賑全活甚衆甃塘路掩遺骸修橋渡收恤

孤寡敦厚姻族至捐已資以釋訟先完賦以急公尤為人所樂道有司給匾旌之

章煜

公舉事實新城人性好解推而無德色於邑之周王廟側貯棺給施者數十年康熙己卯錢江

泛漲見溺骸暴露即開家堰地置義塚募人殮埋復置義田數畝付琪樹菴僧以為春秋祭費邑南

津橋圯於水獨捐工修葺之淶川母子嶺居山隘間建唐張巡祠延僧居住施捨茶湯以濟行人凡

遇飢饉每樂輸為紳士倡

馮鼎珪

公舉事實於潛人慷慨好義鄉民當青黃不接時鼎珪出穀八百石計口稱貸不取子息



歲以為常遇飢出粟賑濟恒至數百餘石歲徵錢糧必先限全完親友逋負力不能償者即焚其券他若施棺木捨葬地靡善不為

孫光哲

公舉事實字詰臣仁和人性孝事親能得其歡心居憂毀幾滅性至耄耄猶思慕如孺子

待昆季友愛推祖宅讓之後被火又撤已屋重構以庇族人康熙甲寅閏變後光哲倡率同志贖還難民數千餘口仇讎完聚又嘗贖故人之鬻子者兼為經畫生理他若焚逋券建橋梁拯貧濟困力行善事通邑號為長者

方擢

公舉事實字書升錢塘人太學生家世業鹽於醴政利弊尤悉康熙三十八年春

聖駕南巡擢率眾迎鑒召問加增鹽課始末擢具陳之乃倚



皇

仁嗣免六萬三千餘金商民惟呼稱慶素於族黨姻婭

貧不能自立者周給之嘗買俞家坦地收瘞親族

中之棺槨暴露者又以餘地建普同塔藏無主骨骸孫邦基中雍正庚戌進士

吳甲

公舉事實字辰賞錢塘貢生性好施予從姪業賈負千金力為補苴有友江姓貧不能娶贈以

金復畀以衣飾西湖舊有義塚年久為牛馬蹂躪屍骸暴露甲捐資盡掩之至惜字紙施湯藥恤孤寡周貧乏皆力行不倦

方啟元

公舉事實字貞甫錢塘人聲弘子性狷介嚴義利之辨父與舅氏陳三治共經紀積貲數

千宜均析啟元曰有母乃有舅力却之舅氏因以舊宅相畀治宅得埋金不取即出徙他所檢還舅

氏子封識如故



# 嘉興府

晉

李祥

嘉靖浙江通志海鹽人隆安中從內史袁崧築滄瀆壘禦孫恩崧為賊所害祥突白刃收崧歸

葬時皆義之名其所居輿城曰教義里

五代

薛仁德

萬厯嘉興府志嘉興人吳中戎府右職為蘇州中令官誥使自郊勞迄祖餞貺遺禮幣一

萬餘緡禮畢還府過崇德堰見牽船人多荷校仁德驚異會令佐來謁因問之對曰崇德當驛路衝要所逋秋稅甚多堰役夫皆是物也仁德曰今夕試與考覈簿籍實欠幾何明日艤舟相待令佐侵



晨具籍呈之所欠九千七百餘緡仁德欣然命從者閱視橐裝幾及其數捐舟送縣空載而去

宋

戴顯甫

舊嘉興府志嘉興人嘉祐癸丑進士選亳州永城尉與母舅杭州陶叔獻同舉進士陶登

第纔旬月卒於京師顯甫扶舅喪歸葬舅始攜子女還外家其母孫無所依迎養於家

衛公佐

兩浙名賢錄字輔之海鹽人事繼母以孝稱族有不能婚嫁者悉仗助之聚書數千卷禮

四方賢士教訓子弟時縣未有學捐地為址又獨任禮殿之役熙寧末飢疫邑人賴以救療元豐中

復飢民皆負稅令滿代者已至轉運使苛留使督通員繹繁益庭公佐悉出粟代輸之弟公寬公望

並敦行宜



聞人倣

舊嘉興府志字彥則嘉興人輕財好施周人艱危閭里貧乏者輒實金於橐伺隙投其家

及知而請謝佯不知也中年未有子有相者謂人倣頷有黑子十一必得子後果得如黑子之數

張仲淳

兩浙名賢錄秀州人居鄉教授好周人急務行陰德不求人知偶一商疾薦投仲淳問其

姓名鄉里言迨而罄裝有十金仲淳具棺殮召其子護喪持金歸復捐貲經紀其葬事一夕夢死者來謝曰荷公厚德無能結草公今生貴子矣已而生子師中舉進士為館職終京西漕使尚書工部

郎中

魯文謚

萬歷嘉興府志字子順家當湖嘗置義莊義塾惠其宗人官終司理

陶菊隱

嘉靖浙江通志嘉興人以疏行德祐末元兵南下菊隱聞勤王之詔散家財招集義兵謁



丈丞相於軍中宋亡遺士流寓者多以為依當  
時同邑有趙孟頫華亭有殷澄稱秀州三義

元

項冠

舊嘉興府志字儀甫嘉興人以富稱於吳欲散  
其財乃助婚喪蠲逋負一時江浙間莫不稱長

者至元二十年境內飢輸粟數萬賑乏活者無算  
元世祖聞而旌之授以將仕郎少府丞力辭不拜  
于衡授淮西  
庶訪司副使

吳英

石門縣志石門人皇慶初即縣東南運河左周  
廣千畝構屋六十楹延師集友與鄉里子弟共

學名曰延  
陵義塾

戴光遠

萬歷嘉興府志字君實嘉興白牛鎮人鎮遠  
郡縣學校不立光遠乃辟地三十畝為殿宇



學舍四十餘楹聚生徒百五十輩延名儒黃珩主之自是鎮人始知學

顧德玉

輟耕錄字潤之橋李人自幼從寧國路儒學教授俞觀光學觀光無子嘗語人曰吾昔寢

疾於杭潤之侍湯藥情至切若父子醫為之感動弗忍受金今我行且老必託之以死既而訪醫吳中病且革趣舟歸德玉進次尹山卒明日至橋李德玉奉其屍斂於家哀經就位邦人士來弔者德玉答拜越明年葬於海鹽近顧氏之先塋歲時祭享惟謹

范國寶

嘉興縣志字谷保宋仲淹七世孫由姑蘇遷橋李數世同居友義不減張鄭博學多才趙

文敏薦諸朝累官提領安撫使家居設義倉建義塾助修學宮著有最樂堂稿傳世

濮鑑

萬厯嘉興府志字明之桐鄉人大德丁未大水渰禾鄉民苦飢鑑捐米千餘石以食飢者所活



甚衆有司上其事給授  
富陽稅務郎加將仕郎

吳宣

兩浙名賢錄字泰然嘉興人有俠氣兄弟析居  
並以義讓元季苗兵將屠邑境宣獨叩軍門請

以身代辭義嚴正主  
帥壯之竟釋城不屠

明

潘允濟

海鹽縣岡經海鹽人邑捍海塘舊雜用土石  
易崩圯洪武三年海溢淪田一千九百餘頃

允濟走闕下請築塘專用石朝  
遣求署丞如法監築邑賴以安

陸宗秀

兩浙名賢錄平湖人為人敦樸有至行永樂  
中應賢良詔徵至京仁廟御極賜寶鈔銀幣

還正統五年歲飢宗秀傾家廩助賑事聞賜勅褒  
獎表其門曰尚義子珪字廷玉景泰六年飢疫明



年益甚珪與弟猷瑜瑾共出穀五千餘斛以賑有司上其事詔授珪迪功郎兄弟四人皆賜宴光祿珪以德義著於鄉鄉人有不平事皆就之取直不至官府邑初建學珪與沈昊共任之落成邑令酌酒祝曰願爾兩家世世衣冠弗絕也

陸平

兩浙名賢錄字國平世居海鹽平生好施處事有繼里有訟者爭就質言出而解洪熙改元歲

大歉民食草木平盡免所貸錢穀作粥以食老弱餓者多全活正統壬戌至景泰乙亥屢飢前後入

粟五千餘石麥八百斛佐有司賑濟詔旌為義民表其宅入京謝恩賜宴光祿寺授教官

劉儼

嘉興府岡記字敬先其先真定人父貞官海鹽遂占籍馬儼博學善詩文娶瞽婦終身愛敬如

賓門人蕭某貧卻其贄又恒周之友人沈德常死無所歸儼止田三畝鬻以葬焉其行誼多類是



屠機

弘治嘉興府志字汝敬平湖人歲飢兩輪粟賑濟例得階服輒辭弗受嘗雪夜過松湖聞葦澤

間有鳴鳴聲棹往視之乃一人手足被縛命舟人負至舟解其縛易故衣以火溫之久而蘇知為句容商人徐甲為盜所刦養之踰月愈而歸以百金酬不納

劉鳳

兩浙名賢錄字景儀其先大梁人曾祖恂仕元為海鹽州學正因家焉鳳慷慨好施舉丈夫子

九人因大啟家塾延名師以教諸子及鄉之俊秀祖墓在城北近海塘每往墓所見海寧衛官軍乘戰船哨沈家門防倭遇颶風率多覆沒鳳憫之具疏上奏畧曰海東遼遠防彼失此枉喪生靈無益請罷之立沿海堡戍便部下其議責居民能保百年無事否鳳乃椎牛釀酒大會里中人曰吾願以一家衆口保設有事請伏辜咸曰諾遂覆奏准罷沈家門之役去船立堡增戍以防歲免生命數千



百人以子秦  
貴封御史

仇必顯

海鹽縣岡經右所人與兄必達同居爰必顯嘗路遇暴屍勸必達買棺瘞之自此遂施棺

及施絮襖濟寒數各五百正統七年夏四月百戶杜忠率衛卒乘船艦禦倭沈家門覆溺依遠島七日不食為出粟五十石募漁筏救之得生者七十二人歸而羅拜於門欲償值之費不受

江濟

嘉興縣志正統五年歲大侵濟傾家產得粟麥二千一百五十石散賑鄉里賴以全活有司以

聞賜璽書褒獎表其門  
曰尚義免雜泛差徭

孫佐

鍾鳴遠

潘壁

舊嘉興府志並平湖人正統五年歲飢各出米二千石助

賑有司上其事賜  
羊酒復其家三年



沈本

陶鉦

萬歷嘉興府志本秀水人。世居邑之永樂里。積織起家。郡邑舉為萬石長守。法

奉公無侵漁。正統辛酉歲飢。詔勸富民賑貸。本首輸粟五千斛。旌為義民。表宅里。未幾闔寇猖獗。郡守帥民兵往禦之。本毅然偕行。無難色。景泰癸酉募富民納粟以實邊。本以白米數百斛應。詔將上道疾作。屬子淳代往。同時陶鉦、菊隱、四世孫輪、穀麥二千石以救荒。朝賜勅獎。子澤捐粟五百石助賑。復輸粟七百石助邊。授七品散官。

文茂

嘉興府志字宗衍。嘉善人。幼孤。弟榮甫三歲。茂遵遺命不析居。異財歷四十餘年。貢吏部授樂

安亟奉府督租。有王某者貧欲鬻女以償茂代輸之女。繪像祀

陸琦

萬歷嘉興府志字文珞。嘉善汾湖人。宣德中父坦將建學宮不果而沒。琦承父命獻地復建。義



塾於汾湖之陰學

士曾鶴齡為記

顧昂

海鹽縣圖經字文顯海鹽人成化中仕為奉新典史家藏鎮數上疏請行鎮城市宜皆報可一

請濬城東南地為河截土築黃家畝塘捍海一請  
豁濬所公佔城池軍營田地稅糧一請以城濠空  
地海上新漲沙地為牧馬場毋令鎮軍縱牧民田  
一請免所軍運艘減馬軍舊額百匹為六十匹免  
遠漕及募牧等  
苦人利賴之

陸源

兩浙名賢錄字本深自嘉禾徙居海鹽性孝友  
為猶子婚娶如已子成化壬辰大猷為粥以食

飢者鄰婦每伺炊畢相率攜幼稚入厨下飽餐畢  
懷飯焦出勿問也繼來亦弗拒遂勅厨下每日多  
作數十人食以待來者隣左右數十家遂竟日不  
舉火通租佃戶入市貿布紀綱奪其布與之俱來



竟還之責紀綱曰以布易粟家中必枵腹待餐忍  
奪之耶好延納四方遊士戶履恒滿即淹留數年  
敬禮無倦容客有持宣公族譜來者曰素聞宗派  
請收之曰財非所吝海溢失譜久矣不敢妄冒論  
者以比狄武  
襄壽八十一

夏安

兩浙名賢錄字世康海鹽人為人慷慨負義氣  
篤倫理重然諾有祝仲容者江右人也隨其父

丞海鹽老而無子不能歸遂依安安為治田里切  
比其居以子昇為之婿無何仲容死或謂盡并宅  
省所費不許無何而子昇又死或又以為言安笑  
曰仲容所以託吾者徒以其妻女耳今身死婿亡  
其妻尚在亡友之約吾可背之  
乎自是周恤益厚終其身不變

朱文才

海鹽縣周經澈浦人慷慨多智畧嘗覽六里  
壩開興水利築文星臺於白苧水漾中从苕



海門寺高閣造禪悅諸廢寺俱堪垂久礪金首  
事人或不盡應傾橐成之人咸目之為朱善士

陶廷錦

萬厯嘉興府志字公重秀水人有隱行友人

期立為封緘授婦其後友人事雪舉囊歸封緘宛  
然族兄倫死無適為後者戚里欲立其子力辭割

腴田四百畝為食貧計竟不受  
任饒州司理陞鎮江府通判

項元孝

舊嘉興府志字子南秀水人以曾大父襄毅  
蔭為錦衣早孤有遺貲萬餘母黃孺人命舛

寄府藏嘉靖甲辰歲侵元孝悉齎以賑所全活飢  
民無算郡守欲上其事元孝曰我豈以此邀名乎

力辭  
遂寢

姚旭

獻徵錄字景陽自湖徙石門嘉施予於昆弟尤  
篤諸昆弟或不能守故產垂盡輒割產與之又



盡則又與以是人皆推為長者官高郵州判時年已五十四一日行小堤上會風起湖中覆船船人多溺死者乃匍匐召水工救之其出水生者給之襦敝流屍葬之城北原上所獲篙櫓器械錢布以萬數令溺水者各自認其物而歸之其無主者悉以犒水工是時全活以貲還者幾百人葬者倍之道路皆咨嗟感涕以不善結納上官遂罷去

夏雷

兩浙名賢錄秀水人叔璧客姑蘇餘三十年垂囊而歸病不起為治殯斂既辦微知吳人有負

璧資者索歸悉畀叔母無所私故人樂松為怨家所搆往來居間費數百緡隣有少婦窺雷獨寢擲餘枕以啖之面發赤流汗脫身走後被旌額賜章服里人以為榮

項德純

秀水縣志名穆以字行元忤子官中祕輕財好施置義田四百二十畝捐郡學及嘉興秀



永嘉三學賑諸生之貧者書法與伯氏少嶽齊  
名有雙美帖行世族子有以襄毅公墓田售他氏  
者捐貲贖之時宗子俊卿為執金吾徙都門移書  
歸其直却勿受也所居燬於火撤壁發藏金追返  
其原主

### 鍾祖述

舊嘉興府志字君明海鹽人嘗與兄祖保共  
經營割地葬宗人鳳彩家十餘畝宅旁甫就

邑人王昉夢至一宮有王者進二縫掖諦視之則  
祖保祖述也王者曰君兄弟殯宗人一案天曹褒  
美兄當益算二紀弟錫一

子同里劉世教紀其事

### 陸珂

天啟平湖縣志字子珍平湖人好義樂施卹宗  
族和鄉黨貧不能婚葬者周之輯格言以勗子

孫曰饒人一著讓人一步為善最樂無欲常安壽  
八十三子文典字希堯甲辰歲飢捐貲設粥以活



流民為貧民張亨娶婦還路拾遺  
金讓墓田捐墓地種種好行其德

陸杲

嘉興府志字元晉平湖人嘉靖進士置田八百畝歸景賢祠歲收其入以周族人謂之族田又

置田五十畝歸世德祠畀宗子供禴祀謂之祭田羣里族之子弟啟塾講業置田二百畝以給稍廩謂之學田以宗族日繁更徭不支置田三百畝營贍之謂之役田又捐貲築邑城子光祖光祚各有名

屠叔方

舊嘉興府志字宗直嘉興人萬歷丁丑進士授鄱陽令靖難時死節諸臣中有胡閭者鄱

陽人叔方宰其邑知之不勝感愴已入為御史即具疏為建文仗節諸臣請諡請祠及修治塚墓卹錄子孫其交遊姻黨之株累世世編戍者一體赦宥神宗從其言



沈維錡

天啟平湖縣志字震躬邑生嘉靖丁巳倭警總督胡宗憲設計誘降厚禮聘維錡往錡慨

然曰此我建功時也時倭巢沈莊衆莫敢入維錡獨往說之欣然請降已而大兵四集盡殲之維錡

實首功督撫欲疏請大用固辭但奏免沈氏十年田稅

沈鸞

舊嘉興府志海鹽人訓導孫肯堂之僕也嘉靖癸丑倭掠邑西郊突入肯堂室執之將加刃焉

鸞以身蔽其主請代死倭不忍害遂兩舍之

陸基誠

舊嘉興府志字存卿平湖人歲侵設糜以食餓莩置義塚施棺藥自當湖至郡城陂塘五

十餘里捐金繕堤途不病涉

張濤

舊嘉興府志字悅清平湖人多隱德娶婦盲相敬如賓蘆漚塲官逋二百金繫郡獄濤代償之



越人駱某好學而貧濟嘗急其難及舉於鄉以百金為壽不受友人趙端償所負金攜七歲孫漢以往濟器漢歸端所償金佐其讀書後漢任諫議執猶子禮終其身

俞錦

天啟平湖縣志字克美平湖人姪彬貧析產過於已子故人金杰死無以殯其子坤來鬻田計

所需給之焚其券嘉靖間築城當事以其居當城址欲廣數丈全之竟自毀其庭寢二十餘間郡守劉慤顏其門曰義門

徐梗

桐鄉縣志桐鄉人嘉靖二十三年捨田一百五畝於學宮以濟貧士是年荒復出米千石賑飢

知縣徐麟旌其義萬厯二十三年子整復捐貲三百金米二十石修學知縣陸錫功亦旌其義

張亨

嘉興府志家海鹽半路亭嘉靖甲辰官兵與倭戰孟家堰死者數千人亨斂殘骸盡瘞之又收



中仗數百餘上之官  
太守劉愨義而旌之

蔣裔

懿行編字隣江嘉善人事親孝舉臆產讓兄歲凶賑粟全活甚衆倭變走避者皆遇害裔將出

犬銜衣而止得免難渡泖失風忽蘆梗環舟咸謂救行之報孫英成進士

丁鉉

舊嘉興府志字九玉嘉善人補光祿丞以父病不之官萬厯時大侵傾囊以濟衣食醫藥日不

暇給蠲良田五十餘畝備學宮春秋之祀邑令上其事朝義旌之

倪津

舊嘉興府志字雲橋嘉善北鄉人萬厯中遇水旱散粟施糜創午莊橋建菩提菴六旬外連舉

四子府縣以德行  
給冠帶年至九十

魯烈

萬厯嘉興府志字元承平湖人任吳江訓導諸生貧者輒周之遇荒設粥救飢仍糴米百石以



助垂虹亭壞捐俸修理生平所置田僅六十畝宦後以半分兄弟甘澹淡以終其身

陸錫命

舊嘉興府志字仲敬平湖人東省歲災以御史往賑捐穀千石佐之存活無算建坊褒美

生平扶災恤難親友待以舉大者常數十家率厚息稱貸為之又捐田百畝於家祠以贍族

張鯤

舊嘉興府志桐鄉清風鄉人居鄉遇事正言相解不徇人以非禮桐邑築城捐資助工監司旌

之卒年  
八十三

鍾啟明

嘉興府志字思梅桐鄉人謨產於其從兄邑城圯捐貲助築歲荒為廉賑飢全活無算

沈思忠

石門縣志字東泉石門人人有緩急即應或不能償即焚其券雖布衣不苟然諾冬夏施

茶湯以濟行者道旁棄棺輒收埋之積二十餘年不倦縣獄失火獨力重建整理淨潔繫囚得安子



寧成

國朝康熙庚戌進士

郁期

郁際

舊嘉興府志期字幾先嘉善人弟際字兆先兄弟敦倫尚義族黨中有三十未

娶者婚之三喪未舉者葬之崇禎庚辰歲飢出米百石以濟後復患蝗施糜三月全活者衆

王任相

褒祀編字爾玉居嘉善清風涇日積善行里黨稱貸歲歉勿責償更應之有鬻子者

焚券給以貲生平信義自持排解立剖子辰舉人

陸瑞銓

舊浙江通志號字屏平湖縣學生值歲荒平糶煮粥全活甚多族指繁衍或不能舉火捐

田六十畝入祠以分給之故人子有零落者輒為收錄毘陵舊族有母子漂泊至湖甯身者捐金贖

之年踰八十卒



徐彬臣

舊嘉興府志字亦于秀水人好奇負志節崇禎丙子舉於鄉有司重其名欲一見不可得

庚辰公車罷歸已抵宿遷矣聞友郁起麟病於費縣之旅舍策蹇往視之起麟死經紀其喪以傳染

得疾卒兩櫬同歸人稱生死交誼

曹煥

懿行編字舒光嘉善人明季諸生隱居東干當事聞其賢每就訪利弊煥目擊踐更累條均田均役議上推恩及物無間親疎會雪夜行船於灘遇負舟夫婦溺水力救得免又解衣衣之終不告

以姓名

張甫

嘉興府志字伯宣平湖縣庠生文名大著後開戶讀書不求仕進輯族譜創宗祠置祭田為闔

族倡生平樂善好施壽九十無疾而卒子兆治亦庠生工詩文



王道隆

續嘉善縣志字爾愚嘉善人性至孝姪適郁

賦二百餘石代為輸納親族待以舉火者數十家  
崇禎辛巳旱蝗捐賑三百石復倡議平糶全活甚  
衆出私錢募人捕蝗  
縣令劉大啟旌其門

陳梁

舊浙江通志原名昌應海鹽人給事中陳所學  
少子入太學遊京師與魏大中定交大中被逮

褒糧從之預為經理其後事大中死賕無所償子  
學泖且就獄梁為乞貸知交輸納海內誦義故升  
濮陽崇信三歲孤女流落  
楊州贖歸撫育擇配士子

鍾景音

嘉興府志字飛卿石門縣庠生明季歲侵道  
殛相望景音寓產賑給全活甚衆子朗進士

歷任  
叅政



張明俊

舊嘉興府志號九芝桐鄉縣庠生遇人吉凶曲意周卹不計有無弟子家貧不受其贄嘗

出見故家子逋賦被械代為之輸

何浩然

舊浙江通志字希孟嘉善人邑庠生博通典籍以道學為已任性仁愛好施家雖貧輒卹

寡助葬杜門不出蕭然物外年七十四卒門人私諡曰仁節先生

國朝

宋應祥

舊浙江通志先世雍邱人明季家禾之角里家貧有志操嘗客池陽旅舍得練囊於藁薦

間封記二百五十金止三宿不去有許邦偉邦佐兄弟踉蹌而至問主人遺金主人茫然且許之許遂號踊爭欲死應祥問實即還之許以半酬堅不受同卹二十餘人環拜之子承武號繩庵力葬三



世恩撫五甥曲  
事長兄惟謹

勞俶融

鄉賢留祀冊石門人邑庠生明崇禎壬午浙西大侵斗米至白金四錢漕不及額俶融率

其弟括倉庾得米八千餘石俱輸之官補一邑荒缺無徵之數又以忠孝訓後人至如修葺學宮興築橋梁道路必勉力拮据為里黨倡

壽八十餘卒康熙三十九年入祠

陸維祺

鄉賢留祀冊字九如嘉善人國子生幼即以長材聞而自處恂恂惟以孝友敦行為事明

崇禎壬午癸未間歲值飢饉死無筭維祺家本寒素典揭捐金買棺殯殮買米賑濟全活數千人桑梓稱為義士遊南雍同舍生寒不能絮立解衣以贈後是生貴顯特遣介持金相贈受書不答悉反其餽康熙三十二年祀鄉賢



丁鑛

鄉賢留祀冊嘉善人從孫以負人田土涉訟鑛棄產代償又追歷年籽粒鑛輸米二百石為族

人倡文廟傾圯倡捐修葺明崇禎壬午米騰貴鑛計姻突按口賑給康熙九年煮粥以食饑者他若

同善會廣仁會捐助無虛歲

吳夢寅

公舉事實字弁玉石門人生而穎悟日覽萬言明崇禎壬午浙西大祲漕不及額夢寅設

法勸輸得米八千餘石以補一邑荒缺無徵之數  
癸末以歲歉蠲免糧銀而奉赦者多飽胥腹夢寅竭力爭之民乃得沾實惠以子涵貴

誥贈通議大夫

張惟赤

鄉賢留祀冊海鹽人順治乙未進士累官戶科給事居鄉捐造營房一百間使兵民分處

歲飢捐米賑濟修建學官開濬海鹽運河邑人立碑記其事



吳三錫

鄉賢留祀冊秀水人順治辛丑進士讓田宅與叔及弟捐置祭田又置義田以贍族人為

棗強令有昆弟爭產計訟七載三錫以至情反復開導二人相對大慟和好如初著勸孝錄行世終

中書  
舍人

董士昌

舊浙江通志號寧庵秀水人順治進士砥行好學然諾不苟嫺戚中孤寡貧乏者為之婚

娶朋友有急解贈無慙色歲歉倡始賑濟民間婦為亂兵所掠捐金完聚任陝西平利令卒於官

查大焜

舊浙江通志字伯符海鹽人事父孝性抗直慷慨遇有不平身為排解與人文洞達無

城府窮疾無告者多方周卹之

夏文華

舊嘉興府志字茂榮石門人性質直事親篤愛與人交必信見枯骨必瘞之康熙庚戌靈



雨民大飢捐資三百金煮糜賑給事  
聞奉旌

周隆

公舉事實字履綏嘉善人幼失怙事祖父母盡孝嘗慕范文正公之為人率二弟陶陸置義田

二頃奉先之外以贍其族友人金姓葉姓負金累百不能償皆焚其券更周之歲饑賑粟冬夏施襦

帳以為常著有訓家恒言

嚴閭綸

鄉賢留祀冊嘉興人康熙癸卯副榜六歲喪母哀泣如成人事父孝養備至家貧速館間

日必一趨省雖風雨不阻遇饑疫廣製方藥以救人并約同志捐資設糜捨棺掩骼行數十年如一

日

張瀾

鄉賢留祀冊秀水人國子生好施與康熙九年水災米騰貴倡行平糶之法全活無算普於茶



湯四十四至濬河道  
築橋路皆盡力為之

沈璜

鄉賢留祀冊字若水嘉興庠生見義必為有薛姓者亦庠生也鬻其子以給衣食璜惻然心傷

之即以售價如數贖歸戒以毋壞書香又庠生陳姓其父充里書逋糧數十金為運弁所辱璜捐貲周急而不收其券咸黃姓雙棺在室貧無以殯勉力助其速葬葬三日其家旋被回祿鄉里咸稱頌之納婢女諱言其父越日其父來彬彬儒雅因問曰何業對曰業儒即歸其女又葺學宮施藥石掩露背著有均田平賦議兩赴賓筵屢舉優行

沈綰

鄉賢留祀冊秀水人邑庠生父廷勸任藥城令是時平清河之亂有婦女失散者勸父請於主

將咸得釋放祖遺祭田倡立條議凡讀書乏膏火者給若干年臻壽耆者給若干騾寡孤獨者給若干



干以親近疏遠為差凡遇孝友誠篤之人必極力推獎使宗族鄰里則而效之雍正元年入祠

莊匏

鄉賢留祀冊嘉興縣庠生嘗買陳氏宅陳乏嗣其祖先神宇朔望供其香火歲餘俟其有主然

後歸之嘗需用柏木議價數十金已交其半及往取乃陳氏祖塋也瞿然急止不追其價郡庠鄉賢名宦二祠歲久傾圯康熙三十年年已八旬寢處郡學鳩工五閱月告成乃歸

陳華育

鄉賢留祀冊嘉善人少失怙母復殉節每忌日必素服茹齋閉戶悲泣自弱冠至七十有

六哀慕無間迎養寡妹撫諸甥誨養婚娶同己子負郭止數頃而節縮盈餘以贍三黨凡待以舉火者不下數百家冬授衣夏給帳施粥施棺疾疫施藥建有嬰堂橋梁道路應修者無不捐資修築

沈志高

鄉賢留祀冊喜善學庠生壬午入闈值歲侵道有菜色者傾橐貽之抵寓資斧不給別貸



以終試事嘗立會仿朱子社倉順治辛卯壬辰發  
困賑濟復思廣之故號廣仁倉邑中貧士及貧士  
之妻守節者  
每歲賙之

沈允聞

鄉賢留祀冊鄉人康熙庚午舉人薦於親  
誼憐表戚陸聲遠老而無子為之納聘賴有

嗣息有售產救貧者給其值不取其產每歲設家  
塾備膏火課親族子姪之貧而無師者康熙四十  
二年  
入祠

吳之振

鄉賢留祀冊石門人康熙辛亥邑大饑糴米  
二千石分區賑濟全活無算巡撫范承謨旌

其門前令李夢鸞以軍需去官之振代完之辛酉  
歲侵捐粟八百餘石多設粥廠貧民咸受其惠他  
如捐修學宮歲施藥餌建育嬰堂收養棄孩施棺  
槨埋道路死喪勇於為善一時宗族孤寡親友貧



乏咸利賴之嘉興府志字孟舉以歲貢授中書能詩工書著有黃葉村莊詩文集

馮翊

公舉事實字輔之桐鄉人少為諸生以純行聞於閭里事父母及所生母俱以孝稱父歿時幼

弟纔十數齡翊撫之及弟歿以已子嗣之家不甚富人有告急無不應族人老幼不能自存者輒

周給之無吝色學宮久圯倡捐修復子景夏官少司寇

屈希平

公舉事實字又源平湖縣庠生性孝友父卒喪葬盡禮母歿廬墓三載周卹族黨無倦色

逢水旱出粟賑濟冬月施襦死不能殮者施棺一邑推長者事聞奉旌

孫在鎬

鄉賢留祀冊嘉善人父母歿事長兄必誠必敬撫諸弟長育教誨之凡喪葬徭賦之事皆

獨任年二十登賢書性甘淡泊平居褐衣蔬食不厭而周恤親族無吝色治家嚴肅子弟不衣冠不



敢見有萬  
石君之風

何漢偉

公舉事實字君階秀水人幼時割股療母疾人稱其孝長好施予凡族黨困乏解推周恤

不責其償晚年偶疾恐不起檢篋中夙逋存券悉焚之尋復愈嘗至吳門於閭門厠問拾白金一包生俟之未幾有踰跟而來呼號尋覓者詢之蓋嘉興舟子受托寄蘓行買貨者遂還之題旌冊雍正十一年以孝行題旌

錢同文

嘉興府志字養真精岐黃術凡乞療者以至之先後為序不論富貴貧賤有不能具參附

者每出筭中蓄入咬咀不以告有荷擅者嘔血數升來求治同文潛以白金半錠雜藥中其人以為誤遣持還之同文曰吾安得有金其人得金心喜投藥立愈



金京望

公舉事實字達庵平湖人父煜以善行聞於鄉京望讀書入成均有友無力營葬割贈腴

產為兆城費官兩次修葺皆捐貲倡率祖居瀕水行者梗於途獨建石梁二遠近便之以子南鏐貴

贈如其官

胡光銓

公舉事實平湖人幼喪父母哀毀若成人事祖母承顏不懈有叔病劇以幼子女托付光

銓經營後事撫養教訓婚嫁既畢乃以歷年生息具一清冊交還其子堂弟夫婦相繼早亡亦遺三子一女光銓復為婚嫁俾之成立他若周濟里黨修葺學宮多善行生五子紹高紹安成進士

汪文桂

公舉事實桐鄉人事父母孝於三黨九族中殫力周恤康熙戊子己丑間旱澇相繼設粥

廠立藥局全活甚衆歲丙午被水災首倡賑濟以食饑民他若新文廟築城垣修橋梁開河道好義



捐資一無吝色以子繼  
爆官累封奉直大夫

陸其燧

公舉事實平湖人樂善好施仲弟早世撫其遺孤而以祖遺已屋讓焉割腴田為外父沈

扶民卜兆且謀及孫嘗朋友以緩急告者無不應有潘榮翰者早卒無嗣而家有未舉之喪其燧出資為營葬康熙戊子歲飢倡捐煮賑於報本塔院全活無算有遠道及老幼不能至者以米遺之有稱貸不責償或焚其券人犯之未嘗校也

張嶺

公舉事實字如岡平湖人九歲父喪晝夜號泣如成人母歿擗踊投地絕而復甦補邑庠生益

以道義自守輕財利重然諾族黨中有緩急傾囊濟之戊子巳丑間水旱出米數百石設糜粥以賑之復廣施丹藥以療疫痢全活無算年四十歿聞者嗟悼焉



程琳

公舉事實字丹雲桐鄉人事母以孝聞且能推孝友之義旁及族黨遠及異姓於縣治之城隍

祠青鎮之東塔院製棺施捨三十餘年未嘗輟捐修文廟及城隍廟水旱出粟賑濟積行累仁聲聞

四

達

金學汾

公舉事實字崑溶桐鄉人幼有器識與羣兒嬉水濱見一兒溺衆皆驚走獨蹇裳救之有

負重貨者

憫其無以為生焚其券有附舟歸者中途病死殮之歸其喪他若賑粥施衣修學宮勸橋

最善常不

可枚舉

浙江通志卷一百八十七